

M312: Hartmann von Aue: Iwein (B)

0,1 swer an rehte güete .
0,2 wendet sîn gemüete .
0,3 dem volget sælde unde êre .
0,4 des gît gewisse lêre .
0,5 küninc Artûs der guote .
0,6 der mit rîtærs muote .
0,7 nâch lobe kunde strîten .
0,8 er hât bî sînen zîten .
0,9 gelebet alsô schône .
0,10 daz er der êren krône .
0,11 dô truoc . unde noch sîn name treit .
0,12 des habent die wârheit .
0,13 sîne lantliute .
0,14 si jehent er lebe noch hiute .
0,15 er hât den lop erworben .
0,16 ist im der lîp erstorben .
0,17 sô lebet doch iemer sîn name .
0,18 er ist lasterlîcher schame .
0,19 iemer vile gar erwert .
0,20 der noch nâch sînem site vert .
0,21 ein rîtær der gelêrt was .
0,22 unde ez an den buochen las .
0,23 swenne er sîne stunte .
0,24 niht baz bewenden kunde .
0,25 daz er ouch tihtennes pflac .
0,26 daz man gerne hoeren mac .
0,27 dâ kêrte er sînen vlîz an .
0,28 er was genant Hartman .
0,29 unde was ein Ouwære .
0,30 der tihte diz mære .
0,31 ez hête der küninc Artûs .
0,32 ze Karidôl in sîn hûs .
0,33 ze einen pfingesten geleit .
0,34 nâch rîcher gewoneheit .
0,35 eine alsô schoene hôchzît .
0,36 daz er dâ vore noch sît .
0,37 decheine schoener nie gewan .
0,38 daz ist wâr dâ was ein boeser man .

0,39 in vile swachem werde .
0,40 wande sich gesameneten ûf der erde .
0,41 bî niemannes zîten anderswâ .
0,42 sô manic guot rîtar als dâ .
0,43 ouch wart in dâ ze lône gegeben .
0,44 in allen wîs ein wunschleben .
0,45 in liebete den hov unde den lîp .
0,46 manic maget unde wîp .
0,47 die schoenesten von den rîchen .
0,48 mich jâmert wêrlîchen .
0,49 unde hülfe ez iht ich wolte ez klagen .
0,50 daz nû bî unsern tagen .
0,51 solich vrôuwede niemer werden mac .
0,52 der man ze den zîten pflac .
0,53 doch müezen wir ouch nû genesen .
0,54 ich ne wolte dô niht sîn gewesen .
0,55 daz ich nû niht en wære .
0,56 dâ uns noch mit ire mære .
0,57 sô rehte wole wesen sol .
0,58 dâ tâten in diu werc vile wole .
0,59 Artûs unde diu kûningîn .
0,60 ir ietwederz under in .
0,61 sich ûf ir aller willen vleiz .
0,62 dô man des pfingestages enbeiz .
0,63 mennegelîch im die vrôuwede nam .
0,64 der in dô allerbezziste gezam .
0,65 dise sprâchen wider diu wîp .
0,66 dise baneketen den lîp .
0,67 dise tanzeten . dise sunge .
0,68 dise liefen dise sprunge .
0,69 dise hôrten seitpil .
0,70 dise schutzen zuo dem zile .
0,71 dise redeten von senenter arbeit .
0,72 dise von manheit .
0,73 Gâwein ahte umbe wâfen .
0,74 Kei legete sich slâfen .
0,75 ûf den sal under in .
0,76 ze gemache âne êre stuont sîn sin .
0,77 der kûninc unde diu kûningîn .
0,78 die hêten sich ouch under in .
0,79 ze handen gevangen .
0,80 unde wâren ensamet gegangen .
0,81 in eine kemenâten dâ .
0,82 unde hêten sich slâfen sâr .
0,83 mêr durch geselleschaft geleit .
0,84 danne durch decheine trâcheit .
0,85 si entsliefen beidiu schiere .
0,86 dô gesâzen rîtar viere .

0,87 Dodines unde Gâwein .
0,88 Segremors unde Iwein .
0,89 ouch was gelegen dâ bî .
0,90 der zuhtlôse Kei .
0,91 ûzerhalb bî der want .
0,92 der sehste was Kâlogreant .
0,93 der begunde in sagen ein mære .
0,94 von grôzer sîner swære .
0,95 unde von decheiner sîner vrûmicheit .
0,96 dô er noch lûtz el hête geseit .
0,97 dô erwachete diu kûningîn .
0,98 unde hôrte sîn sagen hin in .
0,99 si lie ligen den kûninc ire man .
0,100 unde stal sich von im dannen .
0,101 unde gesleich zuo in sô lîse dar .
0,102 daz es ir decheiner wart gewar .
0,103 unz si in kom vile nâhen bî .
0,104 unde viel enmitten under si .
0,105 niuwan eine Kâlogreant .
0,106 der spranc engegen ir ûf zehant .
0,107 er neic ir unde entvie si .
0,108 dô erzeugte aber Kei .
0,109 sîn alte gewoneheit .
0,110 im was des mannes êre leit .
0,111 unde beruofte in dâr umbe sêre .
0,112 unde sprach im an sîn êre .
0,113 er sprach “hêrre Kâlogreant .
0,114 uns was ouch êr daz wole erkant .
0,115 daz under uns nieman wære .
0,116 sô hōvisch unde als êrbære .
0,117 als ir wænet daz ir sît .
0,118 des lâzen wir iu den strît .
0,119 vore allen iuweru gesellen .
0,120 ob wir selbe wellen .
0,121 iuch dunket des man sule in iu lân .
0,122 ouch sol ez mîn vrouwe dâ vûre hân .
0,123 si tæte iu anders gewalt .
0,124 iuwer zuht ist sô manicvalt .
0,125 unde ir dunket iuch sô volkomen .
0,126 daz ist wâr ir habet iuch an genomen .
0,127 ir ne wizzet hiute waz .
0,128 unser decheiner was sô laz .
0,129 hête er die kûningîn ersehen .
0,130 im en wære diu selbe zuht geschehen .
0,131 diu dâ iu einem geschach .
0,132 sît unser decheiner si ne sach .
0,133 ode swie wir des vergâzen .
0,134 daz wir stille gesâzen .

0,135 dô mohtet ouch ir gesezzen sîn .”
0,136 des antwurte im diu künigîn .
0,137 si sprach “Kei daz ist dîn site .
0,138 unde en schadest nieman mêr dâ mite .
0,139 danne dû dir selbem tuost .
0,140 daz dû den iemer hazzen muost .
0,141 dem dechein êre geschihet .
0,142 dû erlâst dînes nîdes niht .
0,143 daz gesinde noch die geste .
0,144 der boeseste ist dir der bezziste .
0,145 unde der bezziste der boeseste .
0,146 eines dinges ich dich troeste .
0,147 daz man dir ez iemer wole vertreit .
0,148 daz kumet von dîner gewoneheit .
0,149 daz dû es die boesen alle erlâst .
0,150 unde daz dû haz ze den vrumen hâst .
0,151 dîn schelten ist ein prîsen .
0,152 wider alle die wîsen .
0,153 dû ne hêtest diz gesprochen .
0,154 dû wærest bînamen zerbrochen .
0,155 unde wære daz weiz got vile wole .
0,156 wan dû bist bitters eiters vol .
0,157 dâ dîn herze inne swebet .
0,158 unde wider dîn êre strebet .”
0,159 Kei den zorn niht vertruoc .
0,160 er sprach “vrouwe es ist genuoc .
0,161 ir habet mir es ouch ze vile gesaget .
0,162 unde hêtet ir es ein teil verdaget .
0,163 daz zæme iuwer mînen wile .
0,164 ich entpfâhe gerne als ich sol .
0,165 iuwer zuht unde iuwer meisterschaft .
0,166 doch hât si alze grôze kraft .
0,167 ir sprechet alze sêre .
0,168 den rîtærn an ire êre .
0,169 wir wâren es an iu ungewon .
0,170 ir werdet unwert dâr von .
0,171 ir strâfet mich als einen kneht .
0,172 genâde ist bezzer danne reht .
0,173 ich ne hân iu soliches niht getân .
0,174 ir ne mohtet mich wile leben lân .
0,175 unde wære mîn schulde grôzer iht .
0,176 sô belibe mir der lîp niht .
0,177 vrouwe habet genâde mîn .
0,178 unde lât sus grôzen zorn sîn .
0,179 iuwer zorn ist ungenædiclich .
0,180 niene brechet iuwer zuht durch mich .
0,181 mîn laster wile ich vertragen .
0,182 daz ir ruochet gedagen .

0,183 ich kume nâch mînen schulden .
0,184 gerne ze sînen hulden .
0,185 nû bitet in sîn mære .
0,186 des êr begunnen wære .
0,187 durch iuwer liebe volsagen .
0,188 man mac vile gerne vore iu dagen .”
0,189 sus antwurte Kâlogreant .
0,190 “ez ist umbe iuch sô gewant .
0,191 daz iu daz nieman merken sol .
0,192 sprechet ir anders danne wole .
0,193 mir ist ein dinc wole kunt .
0,194 ez ne sprichet niemannes munt .
0,195 wan als in sîn herze lêret .
0,196 swen iuwer zunge unêret .
0,197 dâ ist daz herze schuldic an .
0,198 in der werlte ist manic man .
0,199 valsch unde wandelbære .
0,200 der gerne biderbe wære .
0,201 wan daz in sîn herze en lât .
0,202 swer iuch mit lêre bestât .
0,203 daz ist ein verloreniu arbeit .
0,204 ir ne sulet iuwer gewoneheit .
0,205 durch nieman zerbrechen .
0,206 der humbel der sol stechen .
0,207 ouch ist reht daz der mist .
0,208 stinke swâ der ist .
0,209 der hornuz der sol diezen .
0,210 ich ne mohte niht geniezen .
0,211 iuwers lobes noch iuwer vriuntschaft .
0,212 wan iuwer rede hât niht kraft .
0,213 ouch en wile ich niht entgelten .
0,214 swaz ir mich müget geschelten .
0,215 wâr umbe soltet ir mich es erlân .
0,216 ir habet ez tiurerem manne getân .
0,217 doch sol man ze dirre zît .
0,218 unde iemer mêre swâ ir sît .
0,219 mînes sagennes entbern .
0,220 mîn vrouwe sol mich des gewern .
0,221 daz ich es mit ire hulden über sî .”
0,222 dô sprach der hêrre Kei .
0,223 “nû en lât disen hêrren .
0,224 mîne schulde niht gewerren .
0,225 wan die ne hânt wider iuch niht getân .
0,226 mîn vrouwe sol iuch niht erlân .
0,227 ir ne saget iuwer mære .
0,228 wan ez niht reht wære .
0,229 entgulten si alle mîn .”
0,230 dô sprach diu künigîn .

0,231 “hêrre Kâlogreant .
0,232 nû ist iu selbem wole erkant .
0,233 unde sît gewahsen dâ mite .
0,234 daz in sîne boesen site .
0,235 vile ofte hânt entêret .
0,236 unde daz sich nieman kêret .
0,237 an decheinen sînen spot .
0,238 ez ist mîn bete unde mîn gebot .
0,239 daz ir saget iuwer mære .
0,240 wan ez sîn vrôuwede wære .
0,241 hête er uns der rede erwant .”
0,242 dô sprach Kâlogreant .
0,243 swaz ir gebietet daz ist getân .
0,244 sît ir mich es niht wellt erlân .
0,245 sô vernemet mit guotem site .
0,246 unde mietet mich dâ mite .
0,247 ich sage iu destе gerner vile .
0,248 ob man ez ze rehte merken wile .
0,249 man verliuset michel sagen .
0,250 man en well ez merken unde dagen .
0,251 maniger biutet diu ôren dar .
0,252 er ne neme es ouch mit dem herzen war .
0,253 sô ne wirdet im niuwan der dôz .
0,254 unde ist der schade alze grôz .
0,255 wan si verliesent beide ire arbeit .
0,256 der dâ hoeret unde der dâ seit .
0,257 ir müget mir destе gerner dagen .
0,258 wan ich ne wile iu decheine lüge sagen .
0,259 ez geschach mir dâ von ist ez wâr .
0,260 ez sint nû wole zehen jâr .
0,261 daz ich nâch âventiure reit .
0,262 gewâfenet nâch gewoneheit .
0,263 ze Breziljân in den walt .
0,264 dâ wâren die wege manicvalt .
0,265 dô kêrte ich nâch der zeswen hant .
0,266 ûf einen stîc den ich dâ vant .
0,267 der was vile rûch unde enge .
0,268 durch dorne unde durch gedrenge .
0,269 sô vuor ich allen einen tac .
0,270 daz ich vûre wâr wole sprechen mac .
0,271 daz ich sô grôze arbeit .
0,272 nie von ungeverte erleit .
0,273 unde dô ez an den âbent gienc .
0,274 einen stîc ich dô gevienc .
0,275 der truoc mich ûz der wilde .
0,276 unde kom an ein gevilde .
0,277 dem volgete ich eine wîle .
0,278 niht vol eine mîle .

0,279 unz daz ich eine burc ersach .
0,280 dar kêrte ich dô durch mîn gemach .
0,281 sus reit ich gein dem bûrge tore .
0,282 dâ stuont ein rîtar vore .
0,283 er hête den ich dâ stênte vant .
0,284 einen mûzerhabech ûf sîner hant .
0,285 diz was des hûses hêrre .
0,286 unde als er mich von verre .
0,287 zuo im sach rîten .
0,288 nû ne mohte er niht erbîten .
0,289 unde en lie mir niht der muoze .
0,290 daz ich zuo sînem gruoze .
0,291 volliclîche wære komen .
0,292 er ne hête mir êr genomen .
0,293 den zoum unde den stegereif .
0,294 unde als er mich alsô begreif .
0,295 dô entvienc er mich schône .
0,296 als im got iemer lône .
0,297 nû hienc ein tavel vore dem tore .
0,300 an zwein ketenen enbore .
0,301 dâ sluoc er an daz ez erhal .
0,302 unde daz ez in die burc erschal .
0,303 dâr nâch was vile unlanc .
0,304 unz daz dort her vûre spranc .
0,305 des wirtes samenunge .
0,306 schoene unde junge .
0,307 junchêrren unde knehte .
0,308 gekleidet nâch ire rehte .
0,309 die hiezen mich willekomen sîn .
0,310 mînes rosses unde mîn .
0,311 wart vile guot war genomen .
0,312 unde vile schiere sach ich komen .
0,313 dô ich in die burc gie .
0,314 eine juncvrouwen diu mich entvie .
0,315 ich jihe noch als ich dô jach .
0,316 daz ich nie schoener kint gesach .
0,317 diu entwâfenet mich .
0,318 unde einen schaden klagete ich .
0,319 des ne wunder nieman .
0,320 daz der wâfenriemen .
0,321 alsô rehte lûtzel ist .
0,322 daz si niht langer vrist .
0,323 mit mir solte umbe gân .
0,324 ez was ze schiere getân .
0,325 ich ne ruochte unde solte ez iemer sîn .
0,326 ein scharlaches mendellîn .
0,327 daz gap si mir an .
0,328 ich unsæliger man .

0,329 daz si mîn ouge ie gesach .
0,330 dô uns ze scheidenne geschach .
0,331 wir zwei beliben eine .
0,332 nû verstuont sich wole diu reine .
0,333 daz ich gerne bî ir was .
0,334 an ein daz schoeneste gras .
0,335 daz diu werlt ie gewan .
0,336 dâ vuorte si mich an .
0,337 ein wênic von den liuten baz .
0,338 daz liez ich weiz got âne haz .
0,339 hier vant ich wîsheit bî der jugent .
0,340 grôze schoene unde ganze tugent .
0,341 si saz mir guotlîchen bî .
0,342 unde swaz ich sprach daz hôrte si .
0,343 unde antwurte es mit gûete .
0,344 ez ne betwanc mîn gemûete .
0,345 noch bekumberte mînen lîp .
0,346 nie sô sêre maget noch wîp .
0,347 unde getuot ouch lîhte niemer mêr .
0,348 ou wê iemer unde ou wê .
0,349 waz mir dô vröuweden benam .
0,350 ein bote der von dem wirt quâm .
0,351 der hiez uns beidiu ezzen gân .
0,352 dô muose ich vröuwede unde rede lân .
0,353 dô ich mit ir ze tische gienc .
0,354 der wirt mich anderstunt entvienge .
0,355 ez ne gebôt nie wirt mêre .
0,356 sînem gaste grôzer êre .
0,357 er tet den stîgen unde den wegen .
0,358 vile manigen guotlîchen segen .
0,359 die mich gewîset hêten dar .
0,360 hier mit überguldete er ez gar .
0,361 daz er mich ir nie verstiez .
0,362 unde mich sô guotlîchen liez .
0,363 mit der juncvrouwen ezzen .
0,364 ouch en wart dâ niht vergezzen .
0,365 wir ne hêten alles des die kraft .
0,366 daz man dâ heizet wirtschaft .
0,367 man gap uns spîse diu was guot .
0,368 dâ zuo den willigen muot .
0,369 dô wir mit vröuweden geâzen .
0,370 unde dâ nâch gesâzen .
0,371 unde ich im daz hête geseit .
0,372 daz ich nâch âventiure reit .
0,373 des wunderte in vile sêre .
0,374 unde jach daz im nie mêre .
0,375 dechein der gast wære komen .
0,376 von dem er daz hête vernomen .

0,377 daz er âventiure suochte .
0,378 unde bat daz ich des geruochte .
0,379 swenne ich den wec dâ wider rite .
0,380 daz ich in danne niene mite .
0,381 dâ wider hête ich decheinen strît .
0,382 ich lobete ez unde leiste ez sît .
0,383 dô slâfennes zît wart .
0,384 dô gedâhte ich an mîne vart .
0,385 unde dô ich niene wolte .
0,386 noch belîben solte .
0,387 dô wart der ritterlîchen maget .
0,388 von mir genâde gesaget .
0,389 ire guoten handelunge .
0,390 diu sûeze unde diu junge .
0,391 diu lachete unde neic mir .
0,392 sehet dô muose ich von ir .
0,393 daz gesinde bevalch ich gote .
0,394 ze mînes wirtes gebote .
0,395 dâ bôt ich mich vile ofte zuo .
0,396 dannen schiet ich unde reit vile vruo .
0,397 ze walde von gevilde .
0,398 dâ râmete ich der wilde .
0,399 unde vant nâch mitten morgene .
0,400 in dem walde verborgen .
0,401 ein breitez geriute .
0,402 âne die liute .
0,403 dâ gesach ich mir vile leide .
0,404 eine swære ougenweide .
0,405 aller der tiere hande .
0,406 die man mir ie genante .
0,407 vehten unde ringen .
0,408 mit eislîchen dîngen .
0,409 dâ vâhten mit grimme .
0,410 mit griuwelîcher stimme .
0,411 wisente unde ûrrinder .
0,412 dô gehabete ich hinder .
0,413 unde rou mich daz ich dar was komen .
0,414 unde hêten si mîn war genomen .
0,415 sô ne trûwete ich mich anders niht erwern .
0,416 wan ich bat mich got nern .
0,417 von in wolte ich gerne dannen .
0,418 dô gesach ich sitzen einen man .
0,419 in almitten under in .
0,420 daz getrôste mir den sin .
0,421 dô ich im aber nâher quam .
0,422 unde ich sîn rehte war genam .
0,423 dô vorhte ich in alsô sêre .
0,424 sam diu tier ode mêre .

0,425 sîn mennischlich bilede .
0,426 was anders harte wilde .
0,427 er was einem môre gelîch .
0,428 michel unde als eislich .
0,429 daz ez nieman geloubet .
0,430 ze wâre im was sîn houbet .
0,431 grôzer danne einem ûre .
0,432 ez hête der gebûre .
0,433 ein ragentez hâr ruozvar .
0,434 daz was im vaste unde gar .
0,435 verwalken zuo der swarte .
0,436 an houbete unde an barte .
0,437 sîn antlûtze was wole ellenbreit .
0,438 mit grôzen runzen beleit .
0,439 ouch wâren im diu ôren .
0,440 als einem walttôren .
0,441 vermieset ze wâre .
0,442 mit spannelangem hâre .
0,443 breit als ein wanne .
0,444 dem ungevüegen manne .
0,445 wâren grane unde brâ .
0,446 lanc . rûch . unde grâe .
0,447 diu nase als einem ohsen grôz .
0,448 kurz . wît . niender blôz .
0,449 daz antlûtze durre unde vlach .
0,450 ou wê wie eisliche er sach .
0,451 diu ougen rôt zornvar .
0,452 der munt hête im gar .
0,453 beidenthalp den wangen .
0,454 mit wîte bevangen .
0,455 er was starc unde gezan .
0,456 als ein eber niht als ein man .
0,457 ûzerhalp des mundes türe .
0,458 dâ rageten si her vüre .
0,459 lanc . scharpf . grôz . breit .
0,460 im was daz houbet sô geleit .
0,461 daz im sîn rûhez kinnebein .
0,462 gewahsen zuo den brüsten schein .
0,463 sîn rügge was im ûf gezogen .
0,464 hoveroht unde ûz gebogen .
0,465 er truoc an seltsæniu kleit .
0,466 zwô hiute hête er an geleit .
0,467 die hête er in niuwen stunten .
0,468 zwein tieren abe geschunden .
0,469 er truoc einen kolben als grôz .
0,470 daz mich dâ bî im verdrôz .
0,471 dô ich im sô nâhen quam .
0,472 daz er mîn wole war genam .

0,473 zehant sach ich in ûf stân .
0,474 unde nâhen zuo mir gân .
0,475 weder wider mich sîn muot .
0,476 wære boese ode guot .
0,477 des ne weste ich niht die wârheit .
0,478 unde was iedoch ze wer bereit .
0,479 weder er ne sprach noch ich .
0,480 dô er sweic dô versach ich mich .
0,481 daz er ein stumme wære .
0,482 unde bat mir sagen mære .
0,483 ich sprach “bist dû übel ode guot .”
0,484 er sprach “swer mir niene tuot .
0,485 der sol ouch mich ze vriunde hân .”
0,486 “maht dû mich danne wizzen lân .
0,487 waz krêatiure bist dû .”
0,488 “ein man als dû gesihest nû .”
0,489 “nû sage mir waz dîn ambet sî .”
0,490 “dâ stên ich disen tieren bî .”
0,491 “nû sage mir tuont si dir iht .”
0,492 “si lobeten ez tæte ich in niht .”
0,493 “entriuwen vürhtent si dich .”
0,494 “ich pflige ir unde si vürhtent mich .
0,495 als ire meister unde ire hêrren .”
0,496 “sage waz mac in gewerren .
0,497 dîn meisterschaft unde dîn huote .
0,498 si ne loufen nâch ire muote .
0,499 ze walde unde ze gevilde .
0,500 wan ich sihe wole si sint wilde .
0,501 si ne erkennenent man noch sîn gebot .
0,502 ich ne wânte niht daz âne got .
0,503 der gewalt ieman tohte .
0,504 der si betwingen mohte .
0,505 âne sloz unde âne bant .”
0,506 er sprach “mîn zunge unde mîn hant .
0,507 mîn bete unde mîn drô .
0,508 die hânt mir si gemachet sô .
0,509 daz si bibente vore mir stânt .
0,510 unde durch mich tuont unde lânt .
0,511 swer ouch anders under in .
0,512 solte sîn als ich bin .
0,513 der wære schiere verloren .”
0,514 “hêrre vürhtent si dînen zorn .
0,515 sô gebiut in vride her ze mir .”
0,516 er sprach “niene vürhte dir .
0,517 si ne tuont dir bî mir dechein leit .
0,518 nû hân ich dir vile gar geseit .
0,519 swes dû geruochtest vrâgen .
0,520 nû ne sol dich niht betrâgen .

0,521 dû ne sagest mir waz dû suochest .
0,522 ob dû iht von mir geruochest .
0,523 daz ist allez getân .”
0,524 ich sprach “ich wile dich ez wizzen lân .
0,525 ich suoche âventiure .”
0,526 dô sprach der ungehiure .
0,527 “âventiure waz ist daz .”
0,528 “daz wile ich dir bescheiden baz .
0,529 nû sich wie ich gewâfenet bin .
0,530 ich heize ein rîtær unde hân den sin .
0,531 daz ich suochente rîte .
0,532 einen man der mit mir strîte .
0,533 unde der gewâfenet sî als ich .
0,534 daz prîset in unde slehet er mich .
0,535 gesige aber ich im an .
0,536 sô hât man mich vûre einen man .
0,537 unde wurde werder danne ich sî .
0,538 sî dir nû verre ode bî .
0,539 kunt umbe soliche wâge iht .
0,540 daz verswîc mich niht .
0,541 unde wîse mich dar .
0,542 wande ich nâch anders niene var .”
0,543 alsus antwurte er mir dô .
0,544 “sît dîn gemüete stêt alsô .
0,545 daz dû nâch ungemache strebest .
0,546 unde niht gerne sanfte lebest .
0,547 ich ne gehôrte bî mînen tagen .
0,548 soliches nie niht gesagen .
0,549 waz âventiure wære .
0,550 doch sage ich dir ein mære .
0,551 wile dû den lîp wâgen .
0,552 sô ne darft dû niht mêr vrâgen .
0,553 hier ist ein brunne nâhen bî .
0,554 über kurzer mîle drî .
0,555 ze wære unde kumest dû dar .
0,556 unde tuost dû im sîn reht gar .
0,557 unde tuost dû die widerkêre .
0,558 âne grôze dîn unêre .
0,559 sô bist dû wole ein vrum man .
0,560 dâ ne zwîvel ich niht an .
0,561 waz vrumet ob ich dir mêr sage .
0,562 ich weiz wole unde bist dû niht ein zage .
0,563 sô gesihest dû wole in kurzer vrist .
0,564 selbe waz diu rede ist .
0,565 noch hoere waz sîn reht sî .
0,566 dâ stêt ein kappel bî .
0,567 diu ist schoene unde aber kleine .
0,568 kalt unde vile reine .

0,569 ist der selbe brunne .
0,570 in rüeret regen noch sunne .
0,571 noch en trüebent in die winde .
0,572 des schirmet im ein linde .
0,573 daz nie man schoener gesach .
0,574 diu ist sîn schate unde sîn dach .
0,575 si ist breit . hôch . unde als dicke .
0,576 daz regen noch der sunnen blicke .
0,577 niemer dâr durch en kumet .
0,578 ir ne schadet der winter noch ne vrumet .
0,579 an ire schoene niht ein hâr .
0,580 si ne stê geloubet durch daz jâr .
0,581 unde ob dem brunne stêt ein .
0,582 harte zierlîcher stein .
0,583 undersatzt mit vieren .
0,584 marmelînen tieren .
0,585 der ist gelöchert vaste .
0,586 ez hanget von einem aste .
0,587 von golde ein becke her abe .
0,588 jâ ne wæne ich niht daz ieman habe .
0,589 dechein bezzer golt danne ez sî .
0,590 diu ketene dâ ez hanget bî .
0,591 diu ist ûz silber geslagen .
0,592 wile dû danne niht verzagen .
0,593 sô ne tuo dem becke niht mêr .
0,594 giuz ûf den stein der dâ stê .
0,595 dâ mit des brunnen ein teil .
0,596 daz ist wâr sô hâs dû guot heil .
0,597 gescheidest dû mit êren dannen .”
0,598 hin wîste mich der waltman .
0,599 einen stîc ze der winstern hant .
0,600 ich vuor des endes unde vant .
0,601 der rede eine wârheit .
0,602 als er mir hête geseit .
0,603 ich vant dâ grôz êre .
0,604 man gehoeret niemer mêre .
0,605 diu werlt stê kurz ode lanc .
0,606 sô wünnlîchen vogelsanc .
0,607 als ich ze der linden vernam .
0,608 dô ich dâr zuo geriten quam .
0,609 der ie gewesen wære .
0,610 ein tôtriuwesære .
0,611 des herze wære dâ gevröuwet .
0,612 si was mit vogeln beströuwet .
0,613 daz ich der este schîn verlôs .
0,614 unde ouch des loubes lützel kôs .
0,615 der ne wâren zwêne niender gelîch .
0,616 ire gesanc was als mislich .

0,617 hôch unde nider .
0,618 die stimme gap in wider .
0,619 mit gelîchem galme der walt .
0,620 wie dâ sanc gesange galt .
0,621 den brunnen ich dâr under sach .
0,622 unde swes mir der waltman verjach .
0,623 ein smareides was der stein .
0,624 ûz iegelîchem orte schein .
0,625 ein als gelfer rubîn .
0,626 der morgensterne mohte sîn .
0,627 niht schoener swenne er ûf gât .
0,628 unde in des luftes trûebe lât .
0,629 dô ich daz becke hangente vant .
0,630 dô gedâhte ich des zehant .
0,631 sît ich nâch âventiure reit .
0,632 ez wære ein unmanheit .
0,633 ob ich dô daz verbære .
0,634 ich ne versuochte waz ez wære .
0,635 unde riet mir mîn unwîser muot .
0,636 der mir vile ofte schaden tuot .
0,637 daz ich gôz ûf den stein .
0,638 dô erlasch diu sunne diu êr schein .
0,639 unde zergie daz vogelsanc .
0,640 als ez ein swærez weter twanc .
0,641 diu wolken begunden .
0,642 in den selben stunten .
0,643 in vier enden ûf gân .
0,644 der liechte tac wart getân .
0,645 daz ich die linden kûme gesach .
0,646 grôz ungenâde hier geschach .
0,647 vile schiere dô gesach ich .
0,648 in allen enden umbe mich .
0,649 wole tûsent tûsent blicke .
0,650 dâr nâch sluoc als dicke .
0,651 ein als kreftiger donerslac .
0,652 daz ich ûf der erde gelac .
0,653 sich huop ein hagel unde ein regen .
0,654 wan daz mich der gotes segen .
0,655 vriste von des weters nôt .
0,656 ich wære der wîle dicke tôt .
0,657 daz weter wart als ungemach .
0,658 daz ez den walt nider brach .
0,659 was iener ein boum dâ sô grôz .
0,660 der dâ bestuont der wart sô blôz .
0,661 unde des loubes als lære .
0,662 als er verbrunnen wære .
0,663 swaz lebete in dem walde .
0,664 ez entrünne danne balde .

0,665 daz was dâ zehant tô .
0,666 ich hête von des wetters nô .
0,667 mich des lîbes begeben .
0,668 unde ahte niht ûf mîn leben .
0,669 unde wære ouch sunder zwîvel tô .
0,670 wan daz der hagel unde diu nô .
0,671 in kurzer wîle gelac .
0,672 unde begunde liechten der tac .
0,673 dô disiu vreise zergienc .
0,674 unde ze weter gevienc .
0,675 wære ich gewesen vüre wâr .
0,676 bî dem brunnen zehen jâr .
0,677 ich ne begûzze in niemer mêr .
0,678 wan ich hête ez baz gelâzen êr .
0,679 die vogel kômen wider .
0,680 ez wart von ire gevider .
0,681 diu linde anderstunt bedaht .
0,682 si huoben aber ire süezen braht .
0,683 unde sungen verre baz danne êr .
0,684 mir ne wart dâ vore nie sô wê .
0,685 des ne wære nû vergezzen .
0,686 alsus hête ich besezzen .
0,687 daz ander paradîse .
0,688 die selben vrôuwede ich prîse .
0,689 vüre alle die ich ie gesach .
0,690 jâ wânte ich vrôuwede âne ungemach .
0,691 unangestlîchen iemer hân .
0,692 sehet dô trouc mich mîn wân .
0,693 mir nâhete laster unde leit .
0,694 nû sehet wâ dort her reit .
0,695 ein rîtær des geverte .
0,696 was grimme unde als herte .
0,697 daz ich des wânte ez wære ein her .
0,698 iedoch bereitete ich mich ze wer .
0,699 sîn ros was starc er selbe grôz .
0,700 des ich vile lützel dâ genôz .
0,701 sîn stimme lûtte sam ein horn .
0,702 ich sach wole im was ûf mich zorn .
0,703 als ab ich in einen sach .
0,704 mîn vorhte unde mîn ungemach .
0,705 wart gesenftet iedoch .
0,706 unde gedâhte ze lebenne noch .
0,707 unde gurte mînem rosse baz .
0,708 dô ich wider dâr ûf gesaz .
0,709 dô was er komen daz er mich sach .
0,710 vile lûte rief er unde sprach .
0,711 dô er mich allerverrest kôs .
0,712 “rîtær ir sît triuwelôs .

0,713 mir ne wart von iu niht widerseit .
0,714 unde habet mir lasterliche leit .
0,715 in iuwer hôchvart getân .
0,716 nû wie sihe ich mînen walt stân .
0,717 den habet ir mir verderbet .
0,718 unde mîn wilt ersterbet .
0,719 unde mîn gevûgel verjaget .
0,720 iu sî von mir widersaget .
0,721 ir sulet es buoze bestân .
0,722 ode ez muoz mir an den lîp gân .
0,723 daz kint daz dâ ist geslagen .
0,724 daz muoz wole weinen unde klagen .
0,725 alsus klage ich von schulden .
0,726 ich ne hân wider iuwern hulden .
0,727 mit mînen wîzen niht getân .
0,728 âne schulde ich grôzen schaden hân .
0,729 hier ne sol niht vrides mêre wesen .
0,730 wert iuch ob ir wellt genesen .”
0,731 dô bôt ich mîn unschulde .
0,732 unde suochte sîne hulde .
0,733 wan er was mêre danne ich .
0,734 dô ne sprach er niht wider mich .
0,735 wan daz ich mich werte .
0,736 ob ich mich gerne nerte .
0,737 dô tet ich daz ich mohte .
0,738 daz mir doch lûzel tohte .
0,739 ich tjostierte wider in .
0,740 des vuorte er ouch mîn ros hin .
0,741 daz bezziste heil daz mir geschach .
0,742 daz was daz ich mîn sper zebrach .
0,743 vile schône sazte mich sîn hant .
0,744 hinder daz ros ûf den sant .
0,745 daz ich vile gar des vergaz .
0,746 ob ich ûf ros ie gesaz .
0,747 er nam mîn ros unde lie mich ligen .
0,748 mir was gelûckes dâ verzigen .
0,749 doch en müejete mich niht sô sêre .
0,750 er ne bôt mir nie die êre .
0,751 daz er mich hête an gesehen .
0,752 dô im diu êre was geschehen .
0,753 dô gebârte er rehte dem gelîch .
0,754 als im allertegelîch .
0,755 zehen stunte geschæhe sam .
0,756 der prîs was sîn unde mîn diu schame .
0,757 swaz ich doch lasters dâ gewan .
0,758 dâ was ich unschuldic an .
0,759 mir was der wille harte guot .
0,760 dô ne mohten mir diu werc den muot .

0,761 an im niht volbringen .
0,762 des muose mir misselingen .
0,763 dô mir des rosses wart verzigen .
0,764 ich ne mohte niht iemer dâ geligen .
0,765 dô geruochte ich gên von dannen .
0,766 als ein êrlôser man .
0,767 unde saz aber ze dem brunnen .
0,768 der unzûhte sulet ir mich verkunnen .
0,769 swie niugerne ich anders sî .
0,770 unde sæze ich iemer dâ bî .
0,771 ich ne begûzze in niemer mêre .
0,772 ich entgalt es êr sô sêre .
0,773 dô ich genuoc lange dâ gesaz .
0,774 unde betrahte daz .
0,775 waz mir ze tuonne wære .
0,776 mîn harnasch was ze swære .
0,777 daz ich in gênte niht mohte getragen .
0,778 nû waz mac ich iu mêre sagen .
0,779 wan daz ich in abe schûtete unde gie dannen .
0,780 ich genâdelôser man .
0,781 gedâhte war ich kêrte .
0,782 unz mich mîn herze lêrte .
0,783 daz mir an mînen wirt riet .
0,784 von dem ich des morgenes schiet .
0,785 swie ich dar koeme gegangen .
0,786 ich ne wart nie wirs entvangen .
0,787 danne ouch des âbendes dô ich von im reit .
0,788 daz machete aber sîn hœvischheit .
0,789 wære mir diu êre geschehen .
0,790 in dem laster unde ich wart gesehen .
0,791 mîn handelunge wære genuoc guot .
0,792 sus trôsten si mir mînen muot .
0,793 er unde mîn juncvrouwe .
0,794 daz si got iemer schouwe .
0,795 ich hân einem tôren gelîch getân .
0,796 diu mære der ich laster hân .
0,797 daz ich iuch diu niht kan verdagen .
0,798 ich ne wolte es ouch êr nie gesagen .
0,801 sî iuwer decheinen geschehen baz .
0,802 ob er nû welle der sage ouch daz .
0,803 dô rechenete der hêrre Iwein .
0,804 die künneschaft under in zwein .
0,805 er sprach “neve Kâlogreant .
0,806 ez richet von rehte mîn hant .
0,807 swaz dir lasters ist geschehen .
0,808 ich wile ouch varn den brunnen sehen .
0,809 unde waz wunders dâ sî .”
0,810 dô sprach aber Kei .

0,4818 [!][...] guot spîse unde senfter slâf .
0,4819 diu wâren im bereit hier .
0,4820 unde erwachete dô der tac ûf gie .
0,4821 er hôrte eine messe vruo .
0,4822 unde bereitte sich dâr zuo .
0,4823 als er kempfen wolte .
0,4824 den der dâ komen solte .
0,4825 als er dô nieman komen sach .
0,4826 daz was im leit unde sprach .
0,4827 “hêrre nû wær ich iu bereit .
0,4828 iu ist mîn dienest unverseit .
0,4829 wâ ist der dâ komen sol .
0,4830 mîn bîten kumet mir niht wole .
0,4831 ich sûme mich vile sêre .
0,4832 ez gêt an alle mîne êre .
0,4833 swaz ich nû hier gebîte .
0,4834 es ist zît daz ich rîte .”
0,4835 diu drô tet in allen wê .
0,4836 unde wurden trûric als êr .
0,4837 vile müelich was in ein dinc .
0,4838 si ne westen niht welich gerinc .
0,4839 in allerbezziste êrte .
0,4840 der im den muot bekêrte .
0,4841 der wirt bôt im sîn guot .
0,4842 er sprach “sô ne stât niht mîn muot .
0,4843 daz ich durch guotes miete .
0,4844 den lîp veile biete .”
0,4845 unde widersagete im daz gar .
0,4846 des wurden si harte riuwevar .
0,4847 der wirt unde daz gesinde .
0,4848 diu vrouwe mit ire kinde .
0,4849 ez wart vile dicke von in zwein .
0,4850 sîn bezzister vriunt hêrre Gâwein .
0,4851 an der bete genant .
0,4852 unde er bî im gemanet .
0,4853 si maneten in alsô verre .
0,4854 daz got unser hêrre .
0,4855 im sælde unde êre bære .
0,4856 der barmherze wære .
0,4857 erbarmete er sich über si
0,4858 dâ ne stüente gotes lôn bî .
0,4859 daz bewegete im den muot .
0,4860 wan er was biderbe unde guot .
0,4861 man saget daz in betwûnge .
0,4862 diu tiure manunge .
0,4863 dô er ire dîrfte rehte ervant .
0,4864 unde im sô ofte wart genant .
0,4865 got unde hêrre Gâwein .

0,4866 wan swederm er under den zwein .
0,4867 grôzern unwillen truoc .
0,4868 dem diene er gerne genuoc .
0,4869 des wart sîn muot zwîvelhaft .
0,4870 er gedâhte “ich bedarf wole meisterschaft .
0,4871 sol ich daz wægeste ersehen .
0,4872 mir ist ze spilenne geschehen .
0,4873 ein ze gâch geteiltez spil .
0,4874 daz ne giltet lützel noch vile .
0,4875 niuwan alle mîn êre .
0,4876 ich bedarf wole guoter lêre .
0,4877 unde weiz wole swederz ich kiuse .
0,4878 daz ich dâr an verliuse .
0,4879 ich ne mohte ir beider gepflegen .
0,4880 ode beidiu gelâzen underwegen .
0,4881 ode doch daz eine .
0,4882 sô wære mîn angest kleine .
0,4883 sus weiz ich mîn decheinen rât .
0,4884 ich bin als ez mir nû stât .
0,4885 geunêret ob ich rîte .
0,4886 unde geschendet ob ich bîte .
0,4887 nû ne mac ich ir beider niht bestân .
0,4888 unde getar ouch ir dewederz lân .
0,4889 nû gebe mir got guoten rât .
0,4890 der mich unz her geleitet hât .
0,4891 daz ich mich beidenthalp bewar .
0,4892 alsô daz ich rehte gevar .
0,4893 ich ne wile bînamen die niht lân .
0,4894 der mich êr geheizen hân .
0,4895 unde diu ire angest unde ire leit .
0,4896 niuwan von mînen schulden treit .
0,4897 lieze ich si danne .
0,4898 wie zæme daz vrumen manne .
0,4899 doch wære diu eine maget .
0,4900 harte schiere verklaget .
0,4901 wider dem schaden der hier geschihet .
0,4902 gienge ez mir an die triuwe niht .
0,4903 sô wære ouch dirre wirt wole wert .
0,4904 der hier mîner helfe gert .
0,4905 unde des hêrrn Gâweines swester unde ire kint .
0,4906 diu mir ze herzen gênte sint .
0,4907 durch si selben unde durch in .
0,4908 dem ich des wole schuldic bin .
0,4909 daz ich im niht des abe gê .
0,4910 daz im ze dieneste gestê .
0,4911 muoz ich si underwegen lân .
0,4912 sô habent si des iemer wân .
0,4913 daz ich des lîbes sî ein zage .”

0,4914 nû schiet den zwîvel unde die klage .
0,4915 der grôze rise des si biten .
0,4916 der kom dort zuo in geriten .
0,4917 unde vuorte sîne gevangen .
0,4918 an den hête er begangen .
0,4919 grôze unhövischheit .
0,4920 in wâren aller slahte kleit .
0,4921 ze den zîten vremede .
0,4922 niuwan diu boesesten hemedē .
0,4923 diu ie küchenkneht getruoc .
0,4924 si treip ein getwerē daz si sluoc .
0,4925 mit sîner geiselruoten .
0,4926 daz si vile sêre bluotten .
0,4927 die hêrren riten ungeschuoch .
0,4928 ire hemedē was ein saktuoch .
0,4929 gezerret swarz unde grôz .
0,4930 die edeln rîtær wâren blôz .
0,4931 an beinen unde an armen .
0,4932 den gast begunde erbarmen .
0,4933 diu grôze nôt die si lîten .
0,4934 ire pfert wâren diu si riten .
0,4935 tôtmager unde kranc .
0,4936 ietwederz strûchete unde hanc .
0,4937 die vûeze wâren in unden .
0,4938 zesamene gebunden .
0,4939 unde die hende vaste .
0,4940 ze rûgge mit baste .
0,4941 den gurren die si truogen hin .
0,4942 den wâren die zegel under in .
0,4943 zesamene gevlohten .
0,4944 daz si niene mohten .
0,4945 einander entwîchen .
0,4946 dô si sô jâmerlîchen .
0,4947 ire edel vater rîten sach .
0,4948 daz dô sîn herze niene brach .
0,4949 vore jâmer des wundert mich .
0,4950 wande ez was wole jâmerlich .
0,4951 sus vuorte er si vûre daz bûrge tor .
0,4952 dâ hôrten si in ruofen vore .
0,4953 er hienge si alle viere .
0,4954 ob man si niht schiere .
0,4955 mit ire swester lôste .
0,4956 dô sprach der si dâ trôste .
0,4957 der rîtær der des lewen pflac .
0,4958 “daz ist wâr hêrre ob ich mac .
0,4959 ich ledige unser gesellen .
0,4960 got sol disen vellen .
0,4961 er ist ein unbescheiden man .

0,4962 mich sterket vaste dâr an .
0,4963 iuwer reht unde sîn hôchvart .
0,4964 daz diu ie sô grôz wart .
0,4965 er ne kan sich lasters niht geschamen .
0,4966 daz er si ire geburt unde ire namen .
0,4967 niht kan geniezen lân .
0,4968 swaz si im hêten getân .
0,4969 ich ne sol decheinen rîtær schelten .
0,4970 iedoch muoz er entgelten .
0,4971 sîner ungewizzenheit .
0,4972 daz ist wâr mac ich ez wirdet im leit .”
0,4973 er hête in kurzen stunten .
0,4974 den helm ûf gebunden .
0,4975 unde was schiere bereit .
0,4976 daz lêrte in diu gewoneheit .
0,4977 sîn ros sach er bî im stân .
0,4978 er hiez die brügge nider lân .
0,4979 er sprach “diz sol sich scheiden .
0,4980 unser einem ode uns beiden .
0,4981 nâch schaden unde nâch schanden .
0,4982 ich getrûwe es mînen handen .
0,4983 daz ich sîne drô genider .
0,4984 daz ist wâr er muoz iu wider .
0,4985 iuwer süne gesunde geben .
0,4986 ode er benimet mir daz leben .
0,4987 swederz der sol geschehen .
0,4988 daz hât man schiere gesehen .”
0,4989 sus was im an den risen gâch .
0,4990 sîn lewe volgete im nâch .
0,4991 dô in der rise komen sach .
0,4992 daz was sîn spot unde sprach .
0,4993 “ou wê ir vile tumber man .
0,4994 waz nemet ir iuch an .
0,4995 daz ir als ungerne lebet .
0,4996 unde sus nâch dem tôde strebet .
0,4997 daz ist ein unwîser rât .
0,4998 unde swer iu den gerâten hât .
0,4999 dem ist iuwer leben leit .
0,5000 unde wile sich mit der wârheit .
0,5001 vile wole an iu gerochen hân .
0,5002 als er ouch hât getân .
0,5003 er hât sich gerochen wole .
0,5004 wande ich daz schiere schaffen sol .
0,5005 daz ir im niemer getuot .
0,5006 deweder übel noch guot .”
0,5007 sus antwurte hêrr Iwein dô .
0,5008 “rîtær waz touc disiu drô .
0,5009 lât boese rede unde tuot diu werc .

0,5010 ode ich entsitze ein getwerc .
0,5011 harter danne iuwarn grôzen lîp .
0,5012 lât schelten ungezogeniu wîp .
0,5013 die ne mûgen niht gevehten .
0,5014 unde wile sîn unser trehtîn .
0,5015 nâch rehtem gerihte pflegen .
0,5016 sô sît ir schiere gelegen .”
0,5017 nû hête dem risen geseit .
0,5018 sîn kraft unde sîn manheit .
0,5019 waz im gewæfene tohte .
0,5020 unde wer im geschaden mohte .
0,5021 in dûhte er hête gewæfenes genuoc .
0,5022 an einer stangen die er truoc .
0,5023 des vröuwete sich hêrr Iwein .
0,5024 daz er als ungewâfenet schein .
0,5025 under den arm sluoc er .
0,5026 mit guotem willen daz sper .
0,5027 unde nam daz ors mit den sporen .
0,5028 er hête in ûf die brust erkoren .
0,5029 unde stach im einen solichen stich .
0,5030 daz daz îsich sich .
0,5031 lôste von dem schafte .
0,5032 unde im in dem lîbe hafte .
0,5033 ouch sluoc im der rise einen slac .
0,5034 daz ich iu daz wole sagen mac .
0,5035 hête in daz ros niht vûre getragen .
0,5036 daz er im hête geslagen .
0,5037 noch einen slac als er dô sluoc .
0,5038 es wære ze dem tôde genuoc .
0,5039 dô truoc in daz ros dannen .
0,5040 unz daz er daz swert gewan .
0,5041 sâr kêrte er wider ûf in .
0,5042 unde gestiurte in des sîn sin .
0,5043 sîn kraft unde sîn manheit .
0,5044 dô er wider ûf in reit .
0,5045 daz er im eine wunden sluoc .
0,5046 dô in daz ros vûre truoc .
0,5047 dô sluoc der rise im einen slac .
0,5048 daz er gestrakter lac .
0,5049 ûf dem rosse vûre têt .
0,5050 dô ersach der lewe sîne nôt .
0,5051 unde lief den ungevüegen man .
0,5052 vile harte zorniclîchen an .
0,5053 unde zarte im kleit unde brât .
0,5054 als lanc sô der rûgge gât .
0,5055 von den ahseln her abe .
0,5056 daz der ungevüege knabe .
0,5057 als ein ohse erluote .

0,5058 dô wankte diu ruote .
0,5059 die er dô ze wer truoc .
0,5060 unde dô er nâch dem lewen sluoc .
0,5061 dô entweich im der lewe dannen .
0,5062 unde en traf den lewen noch den man .
0,5063 ze dem slage wart im sô gâch .
0,5064 daz er sich neigte dâr nâch .
0,5065 unde vile nâch dâr nider gelac .
0,5066 êr er erzûge den andern slac .
0,5067 dô hête sich hêrr Iwein .
0,5068 mit vile grôzen wunden zwein .
0,5069 vile wole an im gerochen .
0,5070 unde daz swert durch in gestochen .
0,5071 rehte dâ daz herze lît .
0,5072 dô was verendet der strît .
0,5073 unde viel von der swære .
0,5074 als ez ein boum wære .
0,5075 von des risen valle .
0,5076 vrôuweten si sich alle .
0,5077 den liebe dâr an was geschehen .
0,5078 si hêten heiles ersehen .
0,5079 den rîtar der des lewen pflac .
0,5080 wande si lebeten vûre den tac .
0,5081 âne angest unde âne nôt .
0,5082 dô der rise gelac tôt .
0,5083 des genâdeten si genuoc .
0,5084 dem hêrrn Iwein der in sluoc .
0,5085 dô gerte er urloubes sâr .
0,5086 wande er ne hête sich dâ .
0,5087 niht ze sûmenne mêre .
0,5088 ob er sîn êre .
0,5089 an ir bestæten wolte .
0,5090 der er dâ komen solte .
0,5091 ze helfe umbe mitten tac .
0,5092 diu dâ durch in gevangen lac .
0,5093 dô begunde in der wirt biten .
0,5094 daz wære als guot vermiten .
0,5095 daz er dâ ruowen wolte .
0,5096 wan er ne mohte noch ne solte .
0,5097 dô antwurte er unde sîn wîp .
0,5098 beide guot unde lîp .
0,5099 vile gar in sîne gewalt .
0,5100 daz genâden wart vile manicvalt .
0,5101 daz er dâ hôrte von in zwein .
0,5102 dô sprach mîn hêrr Iwein .
0,5103 “wellt ir mich des geniezen lân .
0,5104 ob ich iu iht gedienet hân .
0,5105 sô tuot ein dinc des ich bite .

0,5106 dâ ist mir wole gelônnet mite .
0,5107 den hêrren Gâwein minne ich .
0,5108 ich weiz wole als tuot er mich .
0,5109 ist unser minne âne kraft .
0,5110 sô ne wart nie guot geselleschaft .
0,5111 den ernest sol ich im niuwen .
0,5112 swâ ich mac intriuwen .
0,5113 hêrre zuo dem rîtet ir .
0,5114 unde grüezet in von mir .
0,5115 unde vüeret mit iu iuweriu kint .
0,5116 diu dâ hier erlediget sint .
0,5117 daz ire swester mit in var .
0,5118 unde vüeret ouch daz getwerc dar .
0,5119 des hêrre hier liget erslagen .
0,5120 ir sulet im des genâde sagen .
0,5121 swaz ich iu hier gedienet hân .
0,5122 wan daz ist gar durch in getân .
0,5123 vrâge er iuch wie ich sî genant .
0,5124 sô tuot im daz erkant .
0,5125 daz ein lewe mit mir sî .
0,5126 dâ erkennet er mich bî .”
0,5127 daz gelobete der hêrre .
0,5128 unde bat in vile verre .
0,5129 swenne er zuo dem brunnen gestrite .
0,5130 daz er dar wider rite .
0,5131 er schüefe im guoten gemach .
0,5132 mîn hêrr Iwein dô sprach .
0,5133 “mîn rîten daz ist mislich .
0,5134 ich kume iu gerne lânt si mich .
0,5135 mit den ich dâ strîten sol .
0,5136 ich getrûwe aber in vile wole .
0,5137 mügen si mir ez abe erstrîten .
0,5138 si ne lânt mich niender rîten .”
0,5139 dô bat dâ man unde wîp .
0,5140 daz got sîn êre unde sînen lîp .
0,5141 vriste unde behuotte .
0,5142 mit lîbe unde mit guote .
0,5143 stuonten si im ze gebote .
0,5144 alsus bevalch er si gote .
0,5145 im wâren die wege wole kunt .
0,5146 unde was ouch deste kurzer stunt .
0,5147 zuo der kappeln komen .
0,5148 nû was diu juncvrouwe genomen .
0,5149 her ûz dâ si gevangen lac .
0,5150 wande ez was wole umbe mitten tac .
0,5151 nû wâren ir in den stunten .
0,5152 die hende gebunden .
0,5153 ire kleider von ir getân .

0,5154 unde niuwan ein hemedē an verlân .
0,5155 unde diu hurt was bereit .
0,5156 unde daz viur dâr under geleit .
0,5157 unde stuont vrouwe Lûnete .
0,5158 ûf ire kniewen an ire gebete .
0,5159 unde bat got der sêle pflegen .
0,5160 wan des lîbes hête si sich bewegen .
0,5161 dô si sich missetrôste .
0,5162 daz si nû nieman lôste .
0,5163 dô kom ire helfære .
0,5164 unde was im vile swære .
0,5165 ire laster unde ire arbeit .
0,5166 die si von sînen schulden leit .
0,5167 ouch hête mîn hêrr Iwein .
0,5168 grôzen trôst ze den zwein .
0,5169 daz got unde ire unschulde .
0,5170 den gewalt niene dulte .
0,5171 daz im iht missegienge .
0,5172 unde daz in ouch vervienge .
0,5173 der lewe sîn geverte .
0,5174 daz er die maget ernerte .
0,5175 nû gâhete er sêre mit den sporen .
0,5176 wande si wære verloren .
0,5177 wær er iht langer gewesen .
0,5178 er sprach “lât genesen .
0,5179 übeliu diet dise maget .
0,5180 swaz man über si hier klaget .
0,5181 des wile ich in ire schulden stân .
0,5182 unde sol si dâ zuo kempfen hân .
0,5183 sô wile ich vehten vûre si .”
0,5184 dô daz gehôrten dise drî .
0,5185 daz versmâhete in vaste .
0,5186 unde entwichen doch dem gaste .
0,5187 unde macheten im wec dar .
0,5188 nû nam er umbe sich war .
0,5189 unde suochte si mit den ougen .
0,5190 die sîn herze tougen .
0,5191 ze allen zîten an sach .
0,5192 unde ir ouch ze vrouwen jach .
0,5193 schiere sach er si sitzen .
0,5194 unde was von sînen wîzen .
0,5195 vile nâch komen als êr .
0,5196 wande si sagent ez tuo wê .
0,5197 swer sînem herzeliebe bî .
0,5198 als gastlîchen sî .
0,5199 nû begunde er umbe schouwen .
0,5200 unde sach vile juncvrouwen .
0,5201 die ire gesindes wâren .

0,5202 die hôrte er gebâren .
0,5203 harte klegelîchen .
0,5204 unde bâten got den rîchen .
0,5205 si sprâchen “got hêrre .
0,5206 wir biten dich vile verre .
0,5207 daz dû uns rechest an dem .
0,5208 der uns unser gespilen neme .
0,5209 wir hêten ire vrume unde êre .
0,5210 nû ne haben wir nieman mêre .
0,5211 der dâ ze kemenâten .
0,5212 getürre umbe uns gerâten .
0,5213 daz uns mîn vrouwe iht guotes tuo .
0,5214 als beide spâte unde vruo .
0,5215 diu vile getriuwe Lûnete .
0,5216 unser liebiu gespîle tet .”
0,5217 diz machete im den muot .
0,5218 ze vehenne starc unde guot .
0,5219 unde reit dar dâ er si sach .
0,5220 er hiez si ûf stên unde sprach .
0,5221 “vrouwe zeiget mir die .
0,5222 die iuch dâ kumbernt sint si hier .
0,5223 unde heizet iuch balde ledic lân .
0,5224 ode si müezen von mir hân .
0,5225 den strît den ich geleisten mac .”
0,5226 unde sîn lewe der sîn pflac .
0,5227 der gehôrte schiere sînen haz .
0,5228 unde trat ouch hin nâher baz .
0,5229 nû was diu reine guote maget .
0,5230 von vorhten als gar verzaget .
0,5231 daz si vile kûme ûf gesach .
0,5232 dô gevie si kraft unde sprach .
0,5233 “hêrre daz vergelte iu got .
0,5234 der weiz wole daz ich disen spot .
0,5235 unde dise schande dulte .
0,5236 âne alle mîne schulde .
0,5237 unde bite unsern hêrren .
0,5238 daz si iu müezen werren .
0,5239 niuwan als ich schuldic sî .”
0,5240 unde zeigte si im alle drî .
0,5241 dô sprach der truhtsæze .
0,5242 “er ist genuoc tumpræze .
0,5243 der her kumet sterben durch dich .
0,5244 nû ist ez genuoc billich .
0,5245 swer selbe des tôdes ger .
0,5246 daz man es ouch den gewer .
0,5247 unde swer ouch danne vehete .
0,5248 sô gar wider dem rehte .
0,5249 wan ez hât allez diz lant .

0,5250 ire untriuwe wole erkant .
0,5251 wie si ire vrouwen verriet .
0,5252 daz si von ire êren schiet .
0,5253 hêre daz ist wâr ich riete iu daz .
0,5254 daz ir iuch es bedæhtet baz .
0,5255 ich erban iu des vile sêre .
0,5256 daz wir iu iuwer êre .
0,5257 müezen benemen unde den lîp .
0,5258 umbe ein sô ungetriuwez wîp .
0,5259 nû sehet ir wole daz unser drî sint .
0,5260 unde wæret ir niht ein kint .
0,5261 sô mohtet ir wole die rede lân .
0,5262 diu iu an den lîp muoz gân .”
0,5263 dô sprach der rîtær mit dem lewen .
0,5264 “ir müget mir harte vile gedröuwen .
0,5265 ir ne müezet mich bestân .
0,5266 ode die juncvrouwen lân .
0,5267 mir hât diu unschuldige maget .
0,5268 bî dem eide gesaget .
0,5269 daz si wider ire vrouwen sî .
0,5270 aller untriuwen vrî .
0,5271 unde daz si ir nie getæte .
0,5272 decheine misseræte .
0,5273 waz dâ von sint iuwer drî .
0,5274 wænet ir daz ich eine sî .
0,5275 got gestuont der wârheit ie .
0,5276 mit den beiden bin ich hier .
0,5277 ich weiz wole die gestênt mir .
0,5278 sus bin ich selbe dritte als ir .
0,5279 dâr an liget wæne ich grôzer kraft .
0,5280 danne an iuwer geselleschaft .”
0,5281 dô sprach der truhtsæze .
0,5282 “swes ich mich vermæze .
0,5283 wider unsern hêren got .
0,5284 des gewünne ich schaden unde spot .
0,5285 hêre ze dem dröuwet ir mir .
0,5286 ich getrûwe im helfe baz danne ir .
0,5287 ich sihe iuch einen geverten hân .
0,5288 den sulet ir heizen hôher stân .
0,5289 iuvern lewen der hier stât .
0,5290 der andern der wirdet guot rât .
0,5291 hier ne vihtet nieman mit iu zwein .”
0,5292 dô sprach der hêre Iwein .
0,5293 “mîn lewe vert mit mir ze aller zît .
0,5294 ich ne vüere in durch decheinen strît .
0,5295 ich ne trîbe in ouch von mir niht .
0,5296 wert iuch sîn tuo er iu iht .”
0,5297 dô riefen si alle under in .

0,5298 er ne tæte sînen lewen hin .
0,5299 mit im væhte nieman dâ .
0,5300 unde er müese ouch sâr .
0,5301 die juncvrouwen brinnen sehen .
0,5302 er sprach “des ne sol niht geschehen .”
0,5303 sus muose der lewe hôher stân .
0,5304 doch ne mohte er des niht verlân .
0,5305 er ne sæhe über den rügge danne .
0,5306 sînen hêrren wider an .
0,5307 sus sint diu wort hin geleit .
0,5308 unde wurden ze strîte gereit .
0,5309 unde wâren alle viere .
0,5310 ze den orsen komen schiere .
0,5311 unde liezen von einander gân .
0,5312 daz si ire puneiz mohten hân .
0,5313 unde triben alle drî dannen .
0,5314 wider ûf den einen man .
0,5315 swaz diu ors mohten gevarn .
0,5316 dâr under muose er sich bewarn .
0,5317 dâr nâch als ein wîse man .
0,5318 der sîne ritterschaft wole kan .
0,5319 unde sîne kraft mit listen .
0,5320 ze rehten staten vristen .
0,5321 si brâchen ûf im alle ire sper .
0,5322 daz sîne daz behielt er .
0,5323 er warf daz ors von in .
0,5324 unde leisierte hin .
0,5325 von in eines ackers lanc .
0,5326 unde tet schiere widerwanc .
0,5327 er drukte vaste sîn sper .
0,5328 vore ûf die brust her .
0,5329 als in diu gewoneheit lêrte .
0,5330 unde als er zuo in kêrte .
0,5331 dô müejete in mit dem swerte .
0,5332 der truhtsæze als er gerte .
0,5333 vore sînen bruodern zwein .
0,5334 den nam er under daz kinnebein .
0,5335 rehte vliegende stach er in .
0,5336 enbore ûz dem satel hin .
0,5337 daz er ûf dem sande gelac .
0,5338 unde alles des verpflac .
0,5339 des im ze schaden mohte komen .
0,5340 sus was der trôst den zwein benomen .
0,5341 wande er lac lange âne sîn .
0,5342 nû riten wider ûf in .
0,5343 die zwêne die noch werten .
0,5344 unde pflâgen sîn mit den swerten .
0,5345 als guote rîtær solten .

0,5346 daz wart in wole vergolten .
0,5347 wande ie sîn eines slac .
0,5348 vaste wider zwein wac .
0,5349 er bedorft wole kraft unde wer .
0,5350 wan zwêne wâren ie eines her .
0,5351 die juncvrouwen bâten alle got .
0,5352 daz er sîne genâde unde sîn gebot .
0,5353 in ze helfe kêrte .
0,5354 unde in ire kempfen êrte .
0,5355 daz er in ze trôste .
0,5356 ire gespilen erlôste .
0,5357 nû ist got sô genædic unde sô guot .
0,5358 unde sô reine gemuot .
0,5359 daz er niemer kunde .
0,5360 sô manigem süezen munde .
0,5361 betelîchiu dinc versagen .
0,5362 ouch wâren si niht zagen .
0,5363 die in dâ an vâhten .
0,5364 wande si in brâhten .
0,5365 in vile angestlîche nôt .
0,5366 ze wâre âne den tôt .
0,5367 bekumberten si in sêre .
0,5368 doch ne mohten si im dechein êre .
0,5369 vürenamens an gewinnen .
0,5370 nû kom ze sînen sinnen .
0,5371 der truhtsæze wider .
0,5372 unde en lac niht mêr dâ nider .
0,5373 er bürete schilt unde swert .
0,5374 unde lief ze den bruodern wert .
0,5375 dô dûhte den lewen er hête zît .
0,5376 sich ze hebenne in den strît .
0,5377 unde lief sâr den gênten man .
0,5378 vile unerbarmiclîchen an .
0,5379 unde zarte im daz îsen .
0,5380 man sach die ringe rîsen .
0,5381 sam si wæren von strôwe .
0,5382 sus entworhte er in dô .
0,5383 wande er in gar zervuorte .
0,5384 swaz er sîn geruorte .
0,5385 von im gewan vrouwe Lûnete .
0,5386 vride von des lewen bete .
0,5387 diu bete was niuwan der tôt .
0,5388 des vröuwete si sich des gienc ir nôt .
0,5389 hier lac der truhtsæze .
0,5390 nû wart der lewe ræze .
0,5391 ze sînen kampfgenôzen .
0,5392 die manigen slac grôzen .
0,5393 hêten entvngen unde gegeben .

0,5394 werten si nû wole daz leben .
0,5395 daz was in guot vüre den tât .
0,5396 wande si bestuont ein michel nôt .
0,5397 hier wâren zwêne wider zwein .
0,5398 wande ez en mohte der hêrre Iwein .
0,5399 den lewen niht vertriben .
0,5400 dô liez er ez ouch belîben .
0,5401 er hête sîner helfe wole entboren .
0,5402 unde liez ez ouch âne grôzen zorn .
0,5403 daz er in sîne helfe spranc .
0,5404 er ne sagete es im danc noch undanc .
0,5405 sus vâhten si beidenthalben an .
0,5406 hier der lewe dort der man .
0,5407 ouch en sparten si lîp noch den muot .
0,5408 solten si dâ von sîn behuot .
0,5409 si wâren werhaft genuoc .
0,5410 unz ir ietweder sluoc .
0,5411 dem lewen eine wunden .
0,5412 dô er der hête entvunden .
0,5413 dô wart er ræzer vile danne êr .
0,5414 ouch tet dem hêrrn Iwein wê .
0,5415 daz er den lewen wunden sach .
0,5416 daz bescheinte er wole wan er zerbrach .
0,5417 sîne senfte gebærde .
0,5418 von des lewen beswærde .
0,5419 gewan er zornes alsô vile .
0,5420 daz er si brâhte ûf daz zil .
0,5421 daz si vile gar verluren ire kraft .
0,5422 unde gehabeten vore im zagehaft .
0,5423 sus wâren si überwunden .
0,5424 iedoch mit vier wunden .
0,5425 die si im hêten geslagen .
0,5426 doch en hôrte in nieman klagen .
0,5427 decheinen schaden der im geschach .
0,5428 niuwan sînes lewen ungemach .
0,5429 nû was ze den zîten site .
0,5430 daz der schuldigære lite .
0,5431 den selben tât den der man .
0,5432 solte lîden den er an .
0,5433 mit kampfe vore gerihte sprach .
0,5434 ob ez alsô geschach .
0,5435 daz er mit kampfe unschuldic wart .
0,5436 daz ne wart ouch hier niht gespart .
0,5437 si wurden ûf den rôst geleit .
0,5438 der vrouwen Lûneten wâren bereit .
0,5439 die juncvrouwen alle .
0,5440 mit manigem vuozvalle .
0,5441 genâdeten si im sêre .

0,5442 unde erbuten im alle die êre .
0,5443 der er von in geruochte .
0,5444 unde vûrebaz danne er suochte .
0,5445 vrouwe Lûnete wart vile vrô .
0,5446 wande ez gezôch ir alsô .
0,5447 si gewan ire vrouwen hulde .
0,5448 unde hête âne schulde .
0,5449 erliten kumber unde nôt .
0,5450 des ergatzte si si unz an ire tôt .
0,5451 noch erkante in dâ weder wîp noch man .
0,5452 unde schiet ouch alsô von dannen .
0,5453 niuwan eine vrouwe Lûnete .
0,5454 diu daz durch sîn gebot tet .
0,5455 daz si in niemanne nante .
0,5456 daz in diu niht erkante .
0,5457 diu doch sîn herze bî ir truoc .
0,5458 daz was wunders genuoc .
0,5459 doch bat si in vile verre .
0,5460 si sprach “lieber hêre .
0,5461 durch got belîbet hier bî mir .
0,5462 wande ich sihe wole daz ir .
0,5463 unde iuwer lewe sît starke wunt .
0,5464 lât mich iuch machen gesunt .”
0,5465 sus sprach der namelôse dô .
0,5466 “ich ne gewinne gemach noch ne werde vrô .
0,5467 niemer unz ûf den tac .
0,5468 daz ich wider gehaben mac .
0,5469 mîner vrouwen hulde .
0,5470 der mangel ich âne schulde .”
0,5471 si sprach “vile selten ich daz wîp .
0,5472 beide ire muot unde ire lîp .
0,5473 iemer geprîse .
0,5474 wande si en ist niht wîse .
0,5475 diu einem alsô vrumen manne .
0,5476 als iu noch hier schînet an .
0,5477 iemer ire hulde widerseit .
0,5478 ob si niht grôzez herzeleit .
0,5479 ûf in ze sprechenne hât .”
0,5480 er sprach “niemer werde mîn rât .
0,5481 ire wille en wære ie mîn gebot .
0,5482 nû gebiete ir unser hêre got .
0,5483 daz si mich bedenke enzît .
0,5484 der kumber der mir nâhen lît .
0,5485 den sage ich nieman wizze Krist .
0,5486 wan dem er doch gewizzen ist .
0,5487 swie nâhen er mînem herzen gê .”
0,5488 si sprach “ist er danne ieman mêr .
0,5489 gewizzen wan iu zwein .”

0,5490 "jâ vrouwe" sprach hêrr Iwein .
0,5491 si sprach "wanne nennet ir si doch ."
0,5492 er sprach "vrouwe nein ich noch .
0,5493 ich muoz ire hulde êr haben baz ."
0,5494 si sprach "nû saget mir doch daz .
0,5495 wie sît ir selbe genant ."
0,5496 er sprach "ich wile sîn erkant .
0,5497 bî mînem lewen der mit mir vert .
0,5498 mir ne werde ire hulde baz beschert .
0,5499 sô wile ich mich iemer schamen .
0,5500 mînes lîbes unde mînes rehten namen .
0,5501 wile ich mich niemer gevrouwen .
0,5502 ich heize der rîtær mit dem lewen .
0,5503 unde swer iu vûre dise tage .
0,5504 von einem rîtær iht sage .
0,5505 des geverte ein lewe sî .
0,5506 dâ erkennet mich bî ."
0,5507 diu vrouwe sprach "wie mac daz komen .
0,5508 daz ich von iu niht hân vernomen .
0,5509 unde iuch nie mêr gesach ."
0,5510 der rîtær mit dem lewen sprach .
0,5511 "daz iu von mir niht ist geseit .
0,5512 daz machet mîn unwerdicheit .
0,5513 ich mohte mit dem muote .
0,5514 mit lîbe unde mit guote .
0,5515 gevrumet hân diu mære .
0,5516 daz ich erkander wære .
0,5517 wirdet mîn gelücke als guot .
0,5518 als mîn herze mîn muot .
0,5519 ich weiz wole sô gediene ich daz .
0,5520 daz ir mich noch erkennet baz ."
0,5521 si sprach "ir ne sît ein boeser man .
0,5522 danne iu noch hier schînet an .
0,5523 sô sît ir aller êren wert .
0,5524 unde des ich êr hân gegert .
0,5525 des bæte ich aber hülfe ez iht .
0,5526 mich dunket ich ne überwinde niht .
0,5527 daz laster unde die schande .
0,5528 swer iuch ûz mînem lande .
0,5529 alsô wunden sihet varn ."
0,5530 er sprach "got müeze iuch bewarn .
0,5531 unde gebe iu sælde unde êre .
0,5532 ich ne belîbe hier niht mêre ."
0,5533 diu vrouwe aber dô sprach .
0,5534 "sît ir versprechet mîn gemach .
0,5535 sô ergibe ich iuch in gotes segen .
0,5536 der mac iuwer baz gepflegen .
0,5537 unde ruoche durch sîne güete .

0,5538 iuwer swærez gemüete .
0,5539 vile schiere verkêren .
0,5540 ze vröuweden unde ze êren .”
0,5541 dannen schiet er trûric dô .
0,5542 wider sich selben sprach er sô .
0,5543 “vrouwe wie lützel dû nû weist .
0,5544 daz dû den slüzzel eine treist .
0,5545 dû bist daz sloz unde der schrîn .
0,5546 dâ daz herze mîn .
0,5547 inne beslozzen lît .”
0,5548 nû hête er rîtennes zît .
0,5549 ouch volgete im von dannen .
0,5550 deweder wîp noch man .
0,5551 niuwan eine vrouwe Lûnete .
0,5552 diu im geselleschaft tet .
0,5553 einen guoten wec hin .
0,5554 dâ gelobete si wider in .
0,5555 daz si sît allez wâr liez .
0,5556 mit ire triuwen si im gehiez .
0,5557 daz si sîn wole gedæhte .
0,5558 unde ez ze rede bræhte .
0,5559 umbe sîne swære .
0,5560 getriuwe unde sô gewære .
0,5561 was diu guote vrouwe Lûnete .
0,5562 daz si ez williclîchen tet .
0,5563 des genâdete er ir wole tûsent stunte .
0,5564 nû was der lewe sô starke wunt .
0,5565 daz er michel arbeit .
0,5566 mit im ûf dem wege erleit .
0,5567 dô er niht mêre mohte gân .
0,5568 dô muose er von dem rosse stân .
0,5569 unde las zesamene mit der hant .
0,5570 mies unde swaz er lindes vant .
0,5571 unde legete daz under in .
0,5572 in sînen schilt unde huop in hin .
0,5573 ûf daz ros vûre sich .
0,5574 daz leben was genuoc kumberlich .
0,5575 sus leit er arbeit genuoc .
0,5576 unz daz in der wec truoc .
0,5577 dâ er eine burc ersach .
0,5578 dar kêrte er dô durch sîn gemach .
0,5579 unde vant beslozzen daz tor .
0,5580 unde einen knappen dâ vore .
0,5581 der erkante wole sînes hêrren muot .
0,5582 sîn hêrre was biderbe unde guot .
0,5583 daz was wole an dem knappen schîn .
0,5584 er hiez in willekomen sîn .
0,5585 ze guoter handelunge .

0,5586 man saget daz in betwünge .
0,5587 diu vile wegemüediu nôt .
0,5588 daz er dâ nam daz man im bôt .
0,5589 man mac den gast lîhte vile .
0,5590 geladen . der belîben wile .
0,5591 im wart daz tor ûf getân .
0,5592 dô sach er gegen im gân .
0,5593 rîtær unde knehte .
0,5594 die in nâch sînem rehte .
0,5595 entviengen unde gruozen .
0,5596 unde im vile gerne buozten .
0,5597 sînen kumber unde sîne nôt .
0,5598 als in ire hêrre gebôt .
0,5599 der selbe gegen im gienc .
0,5600 unde in vroelîche entvienc .
0,5601 unde schuof im solichen gemach .
0,5602 daz er wole an den werken sach .
0,5603 daz sîn wille unde sîn muot .
0,5604 was reine unde guot .
0,5605 im wart vile harte drâte .
0,5606 ein heimelich kemenâte .
0,5607 ze sîner sunder gereit .
0,5608 sîn lewe dâr in zuo im geleit .
0,5609 dâr inne entwâfenete man in .
0,5610 nû sande der wirt hin .
0,5611 nâch zwein sînen kinden .
0,5612 daz nieman mohte vinden .
0,5613 schoener juncvrouwen zwô .
0,5614 den bevalch er in dô .
0,5615 daz si im sîne wunden .
0,5616 salbeten unde bunden .
0,5617 ouch wonete in ire gemüete .
0,5618 ze schoener kunst diu güete .
0,5619 daz si vile schier ernerten .
0,5620 in unde sînen geverten .
0,5621 hier twelte er vierzehen nahte .
0,5622 unz daz er sînes lîbes maht .
0,5623 vile gar wider gewan .
0,5624 unde êr er schiede von dannen .
0,5625 dô begunde der tôt in den tagen .
0,5626 einen grâven beklagen .
0,5627 unde mit gewalte twingen .
0,5628 ze nôtigen dingen .
0,5629 den von dem swarzen dorne .
0,5630 des was er der verlorene .
0,5631 wande er muose im ze suone geben .
0,5632 sînen gesunt unde daz leben .
0,5633 der dannoch lebente hier .

0,5634 zwô schoene juncvrouwen lie .
0,5635 nû wolte diu alte .
0,5636 die jungen mit gewalte .
0,5637 von ire erbe scheiden .
0,5638 daz dienen solte in beiden .
0,5639 dâ zuo diu junger sprach .
0,5640 “swester disen ungemach .
0,5641 den sol dir got verbieten .
0,5642 ich wânte mich nieten .
0,5643 grôzes liebes mit dir .
0,5644 swester dû bist mir .
0,5645 ze ungenædiges muotes .
0,5646 wile dû mich mînes guotes .
0,5647 unde mîner êren . behern .
0,5648 des wile ich mich mit kampfē wern .”
0,7346 –[...] unde stuont noch ûf der wâge ire leben .
0,7347 unz daz diu naht an gienc .
0,7348 unde ez diu vinstēr undervienc .
0,7349 sus schiet si beide diu naht .
0,7350 unde daz ir ietweders maht .
0,7351 wole was dem andern kunt .
0,7352 unde daz si beide dâ ze stunt .
0,7353 an einander genuogte .
0,7354 unde sît ez sich wole vuogte .
0,7355 daz si ez mit êren mohten lân .
0,7356 sô liezen si ez wole understân .
0,7357 unz an den andern tac .
0,7358 si tâten als er ie pflac .
0,7359 der ie rehten muot gewan .
0,7360 swie leide dem vrūmen manne .
0,7361 von dem andern geschihet .
0,7362 kumet ez von muotwillen niht .
0,7363 ob er im den willen trûege .
0,7364 daz er in gerne slûege .
0,7365 er ist im doch niht gehaz .
0,7366 unde behaget im baz .
0,7367 danne dâ bî ein boeser man .
0,7368 des er nie schaden gewan .
0,7369 daz wart an in zwein wole schîn .
0,7370 sich verkunte der hêrr Iwein .
0,7371 wider sînen kampfgēnôz .
0,7372 wande ez vûre eine gâbe grôz .
0,7373 ir ietweder haben wolte .
0,7374 ob er wizzen solte .
0,7375 wer der ander wære .
0,7376 sîniu wehselmære .
0,7377 begunde er wider in hân .
0,7378 er sprach “nû wir hân verlân .

0,7379 unser nîtlîchez spil .
0,7380 ich mac nû reden daz ich wile .
0,7381 ich minnete ie von mîner maht .
0,7382 den liechten tac vûre die naht .
0,7383 dâ lac vile mîner vrôuweden an .
0,7384 unde vrôuwet noch wîp unde man .
0,7385 der tac ist vroelich unde klâr .
0,7386 diu naht trûebe unde swâr .
0,7387 wande si diu herze trûebet .
0,7388 sô der tac ûebet .
0,7389 manheit unde wâfen .
0,7390 sô wile diu naht slâfen .
0,7391 ich minnete unz an dise vrist .
0,7392 den tac vûre allez daz dâr ist .
0,7393 daz ist wâr edel rîtær guot .
0,7394 nû habet ir den selben muot .
0,7395 vile gar an mir verkêret .
0,7396 der tac sî geunêret .
0,7397 ich hazze in iemer mêre .
0,7398 wande er mir alle mîn êre .
0,7399 vile nâch hête genomen .
0,7400 diu naht sî gote willekomen .
0,7401 sol ich mit vrôuweden alten .
0,7402 daz hât si mir behalten .
0,7403 nû sehet ob ich von dem tage .
0,7404 niht grôzen kumber unde klage .
0,7405 wole von schulden haben mege .
0,7406 unde wær er langer drîer slege .
0,7407 die hêten iu den sige gegeben .
0,7408 unde mir benomen daz leben .
0,7409 des erlât mich disiu liebiu naht .
0,7410 diu ruowe gît mir niuwe maht .
0,7411 dâ nâch gêt abe ein swære tac .
0,7412 daz ich danne vehten mac .
0,7413 muoz ich niht wole sorgen .
0,7414 ûf den tac morgen .
0,7415 got en welle mich es erlân .
0,7416 sô muoz ich aber bestân .
0,7417 den allertiuresten man .
0,7418 des ich kûnde ie gewan .
0,7421 den ich dâ meine daz sît ir .
0,7422 got der bewar mir .
0,7423 mînen lîp unde mîn êre .
0,7424 ich ne gevorhte ir nie sô sêre .
0,7425 unde wizzet daz ich nie gewan .
0,7426 ze tuonne mit decheinem manne .
0,7427 den ich sô gerne erkante .
0,7428 ir mohtet âne schande .

0,7429 mir wole sagen iuvern namen .”
0,7430 “ich ne wile mich wider iuch niht schamen .”
0,7431 sprach der hêrre Gâwein .
0,7432 “wir gehellen beide in ein .
0,7433 hêrre ir habet mich des verdigen .
0,7434 hêtet ir eine wîle geswigen .
0,7435 die rede die ir habet getân .
0,7436 die wolte ich gesprochen hân .
0,7437 daz ir dâ minnet daz minne ich .
0,7438 des ir dâ sorget daz hât mich .
0,7438a in vile grôze sorge brâht .
0,7438b wê daz ie kampfes wart gedâht .
0,7439 ez ist hiute hin ein tac .
0,7440 den ich wole iemer hazzen mac .
0,7441 er hât mir die nôt getân .
0,7442 der ich ie was erlân .
0,7443 mir benam daz ist wâr nie mêre .
0,7444 dechein man alsô sêre .
0,7445 mîne werlîche maht .
0,7446 unde mohtet ir vore der naht .
0,7447 ze zwein slegen hân gesehen .
0,7448 sô müese ich iu des siges jehen .
0,7449 ich hân der naht vile kûme erbiten .
0,7450 swaz ich noch hân gestriten .
0,7451 sô gewan ich nie sô grôze nôt .
0,7452 ich vûrhte laster ode den tât .
0,7453 von iu gewinnen morgen .
0,7454 wir sîn in gelîchen sorgen .
0,7455 unde sî iu daz vûre wâr geseit .
0,7456 daz ich durch iuwer vrûmicheit .
0,7457 iu aller der êren gan .
0,7458 der ich niht harte entgelten kan .
0,7459 mîn herze ist leides überladen .
0,7460 daz ich ûf iuvern schaden .
0,7461 iemer sol gedenken .
0,7462 unde swâ ez mich niht sule krenken .
0,7463 dâ geschehe iu alles des ir gert .
0,7464 des sît ir weiz got wole wert .
0,7465 ich wolte daz ez wære alsô .
0,7466 daz dise juncvrouwen zwô .
0,7467 hêten swaz si dûhte guot .
0,7468 unde daz wir diensthaften muot .
0,7469 under einander solten tragen .
0,7470 ich wile iu mînen namen sagen .
0,7471 hêrre ich heize Gâwein .”
0,7472 “Gâwein .” “jâ .” “wie wole daz schein .
0,7473 disen unsenften tac .
0,7474 manigen vîantlîchen slac .

0,7475 hân ich von iu entvangen .
0,7476 iuwer haz ist ergangen .
0,7477 über iuvern gewissen dienstman .
0,7478 unde dâ ne zwîvel ich niht an .
0,7479 swaz ir mir leides habet getân .
0,7480 des wær ich alles erlân .
0,7481 hête ich mich enzît genant .
0,7482 wir wâren wîlent baz erkant .
0,7483 hêre ich bin ez Iwein .”
0,7484 dô wonete under in zwein .
0,7485 liebe bî leide .
0,7486 si vrôuweten sich beide .
0,7487 daz si zesamene wâren komen .
0,7488 daz ir ietweder hête genomen .
0,7489 des andern dechein arbeit .
0,7490 daz was ir beider herzeleit .
0,7491 beide trûren unde haz .
0,7492 rûmeten gâhes daz vaz .
0,7493 unde rîchesent dâr inne .
0,7494 vrôuwede unde minne .
0,7495 daz erzeugten si wole under in .
0,7496 diu swert wurfen si hin .
0,7497 unde liefen einander an .
0,7498 ez ne gelebete nie dechein man .
0,7499 decheinen liebern tac .
0,7500 unde en weiz ouch niht ob ieman mac .
0,7501 alsô lieben geleben .
0,7502 als in got dâ hête gegeben .
0,7503 si underkusten tûsent stunte .
0,7504 ougen wange unde munt .
0,7505 dô der küninc die minne .
0,7506 unde diu küniginne .
0,7507 under in beiden sâhen .
0,7508 unde vriundes umbevâhen .
0,7509 des wunderte si sêre .
0,7510 unde en twelten niht mêre .
0,7511 si begunden dar gâhen .
0,7512 wande si si gerne sâhen .
0,7513 sô vriuntlîche gebâren .
0,7514 unde wer si beide wâren .
0,7515 daz was dô noch unbekant .
0,7516 wan als man ez sît bevant .
0,7517 in hêten die helme unde diu naht .
0,7518 ire gesiune bedaht .
0,7519 unde des kampfes grimme .
0,7520 verwandelt ire stimme .
0,7521 daz si dâ wâren unerkant .
0,7522 hêten si sich niht genant .

0,7523 dô sprach der hêrr Iwein .
0,7524 “der tac der dâ hiute schein .
0,7525 daz swert daz den slac sluoc truoc .
0,7526 den ich hiute ûf iuch gesluoc .
0,7527 diu müezen geunêrt sîn .
0,7528 hêrr Gâwein lieber hêrre mîn .
0,7529 waz mac ich sprechen mêre .
0,7530 wan daz ich iuch êre .
0,7531 als iuwer rîtær unde iuwer kneht .
0,7532 daz ist mîn wille unde mîn reht .
0,7533 ir habet mich ofte geêret .
0,7534 unde ze guote gekêret .
0,7535 mîn dinc sô volliclîchen .
0,7536 daz man mir in den rîchen .
0,7537 mêr guotes hât verjehen .
0,7538 danne es âne iuch wære geschehen .
0,7539 ob ich iuch dâ wider mohte .
0,7540 geêren als ez tohte .
0,7541 des wolte ich iemer wesen vrô .
0,7542 nû ne mac ich anders wan alsô .
0,7543 daz ich iuwer Iwein .
0,7544 iemer schîne unde ie schein .
0,7545 niuwan hiute disen tac .
0,7546 den ich wole iemer heizen mac .
0,7547 die gallen in dem jâre .
0,7548 wande ez ne wart ze wâre .
0,7549 weder mîn hant noch mîn swert .
0,7550 nie der unmâzen wert .
0,7551 daz si iu ie geslüegen slac .
0,7552 ich verwâze swert unde den tac .
0,7553 ouch sol mîn ungewizzen hant .
0,7554 ire geldes selbe sîn ein pfant .
0,7555 daz si iu daz ze wandel gebe .
0,7556 daz si iu diene unz ich lebe .
0,7557 hêrre Gâwein doch ne mohtet ir .
0,7558 niht baz gerochen sîn an mir .
0,7559 si hât mich geunêret .
0,7560 unde iuvern prîs gemêret .
0,7561 si hât sich selben sô erwert .
0,7562 daz iu der sige ist beschert .
0,7563 ich sicher in iuwer gebot .
0,7564 wan daz weiz unser hêrre got .
0,7565 daz ich sigelôs bin .
0,7566 ich scheide iuwer gevangen hin .”
0,7567 “hêrre unde lieber geselle – nein .”
0,7568 sprach der hêrre Gâwein .
0,7569 “daz sich dechein mîn êre .
0,7570 mit iuwer laster mêre .

0,7571 der êren hân ich gerne rât .
0,7572 der mîn vriunt laster hât .
0,7573 waz tohte ob ich mich selben trüge .
0,7574 swaz êren ich mich an züge .
0,7575 doch hânt si alle wole gesehen .
0,7576 waz under uns beiden ist geschehen .
0,7577 ich sicher unde ergibe mich .
0,7578 der sigelôse bin ich .”
0,7579 der hêre Iwein antwurte im dô .
0,7580 “ir wænet lîhte daz alsô .
0,7581 disiu sicherheit geschehe .
0,7582 daz ich ir iu ze liebe jehe .
0,7583 wæret ir mir der vremedest man .
0,7584 der ie ze Kriechen hûs gewan .
0,7585 êr ich iuch sô bestüente mêr .
0,7586 ze wære ich sicherte iu êr .
0,7587 von rehte sicher ich von diu .”
0,7588 “nein hêre geselle ich sicher iu .”
0,7589 sprach der hêre Gâwein .
0,7590 sus werte under in zwein .
0,7591 âne loesen lange zît .
0,7592 dirre vriuntlîche strît .
0,7593 unz der küninc unde diu diet .
0,7594 beide vrâgete unde riet .
0,7595 waz under disen liuten .
0,7596 diu minne mohte diuten .
0,7597 dem hazze alsô nâhen .
0,7598 den si êr dâ sâhen .
0,7599 des man im schiere bejach .
0,7600 sîn neve der hêre Gâwein sprach .
0,7601 “hêre wir sulen ez iu gerne sagen .
0,7602 daz man uns iht habe vüre zagen .
0,7603 noch daz des ieman wân habe .
0,7604 daz wir mit dirre vuoge iht abe .
0,7605 des strîtes komen wellen .
0,7606 wir wâren êr gesellen .
0,7607 daz was uns leider unkunt .
0,7608 hiute unz an dise stunt .
0,7609 nû ne wonet niht hazzes bî uns zwein .
0,7610 ich iuwer neve Gâwein .
0,7611 hân gestriten wider in .
0,7612 dem ich dienesthafter bin .
0,7613 danne in der werlte iemanne .
0,7614 unz er mich vrâgen began .
0,7615 wie ich wære genant .
0,7616 als im mîn name wart erkant .
0,7617 dô nante er sich sâr .
0,7618 unde rûmte vîantschaft dâ .

0,7619 unde gehellen iemer mêr in ein .
0,7620 ez ist mîn geselle hêrr Iwein .
0,7621 unde geloubet mir daz ich iu sage .
0,7622 hête er ez gehabet an dem tage .
0,7623 mich hête brâht in arbeit .
0,7624 mîn unreht unde sîn manheit .
0,7625 diu juncvrouwe hât rehtes niht .
0,7626 vüre die man mich hier vehten sihet .
0,7627 ire swester ist mit rehte hier .
0,7628 sô half ouch got den rehten ie .
0,7629 des wære ich tôt von sîner hant .
0,7630 hête ez diu naht niht erwant .
0,7631 sît mir geviel daz unheil .
0,7632 sô ist mir lieber ein teil .
0,7633 nâch grôzem ungevelle .
0,7634 daz mich mîn geselle .
0,7635 habe überwunden danne erslagen .”
0,7636 die rede begunde hêrr Iwein klagen .
0,7637 unde wart vore leide schamrôt .
0,7638 daz er im der êren bôt .
0,7639 ein lützel mêre danne genuoc .
0,7640 daz êren er im niht vertruoc .
0,7641 wan redete er wole sô redete er baz .
0,7642 hier was zorn âne haz .
0,7647 des vrôuwete der küninc sich .
0,7648 er sprach “ir müezet an mich .
0,7649 den strît lâzen beide .
0,7650 daz ich in iu bescheide .
0,7651 des iuch durch reht genüeget .
0,7652 unde sich mir ouch vüeget .”
0,7653 diu rede wart im bevolhen gar .
0,7654 die juncvrouwen ladete er dar .
0,7655 er sprach “wâ ist nû diu maget .
0,7656 diu ire swester hât versaget .
0,7657 niuwan durch ire übermuot .
0,7658 ire erbeteil unde ire guot .
0,7659 daz in ire vater beiden lie .”
0,7660 dô sprach si gâhes “ich bin hier .”
0,7661 dô si sich alsô versprach .
0,7662 unde unrehtes selbe jach .
0,7663 des wart Artûs der küninc vrô .
0,7664 ze geziuge zôch er si alle dô .
0,7665 er sprach “vrouwe ir habet verjehen .
0,7666 daz ist vore sô vile diet geschehen .
0,7667 daz ir es niht wider müget komen .
0,7668 daz ir ir nû habet genomen .
0,7669 daz müezet ir ir wider geben .
0,7670 wellt ir nâch gerihte leben .”

0,7671 “nein” sprach si “hêrre hêrre durch got .
0,7672 ez stêt in iuwer gebote .
0,7673 beide guot unde lîp .
0,7674 jâ gesprichet lîhte ein wîp .
0,7675 des si niht sprechen solte .
0,7676 swer daz rechen wolte .
0,7677 daz wir wîp gesprechen .
0,7678 der müese vile gerechen .
0,7679 wir wîp bedurfen alle tage .
0,7680 daz man uns tumbe rede vertrage .
0,7681 wande si underwîlen ist .
0,7682 herte . unde doch âne argen list .
0,7683 geværlîch unde doch âne haz .
0,7684 wan wir ne kunnen leider baz .
0,7685 swie ich mit worten habe gevarn .
0,7686 doch sulet ir iuwer reht bewarn .
0,7687 daz ir mir iht gewalt tuot .”
0,7688 er sprach “ich lâze iu iuwer guot .
0,7689 unde iuwer swester habe daz ire .
0,7690 der strît ist lâzen her ze mir .
0,7691 ouch hât sich diu guote .
0,7692 mit invaltem muote .
0,7693 sô gar her ze mir verlân .
0,7694 si muoz ire teil ze rehte hân .
0,7695 gehellen wir zwei in ein .
0,7696 ez jîhet mîn neve Gâwein .
0,7697 daz er den sige verloren habe .
0,7698 sô kumet ir des strîtes abe .
0,7699 mit laster unde âne êre .
0,7700 sus ist ez iemer mêre .
0,7701 iuwer prîs unde iuwer heil .
0,7702 lât ir mit minnen ire teil .”
0,7703 diz redete er wande er weste .
0,7704 ire herze alsô veste .
0,7705 an hertem gemüete .
0,7706 durch reht noch durch güete .
0,7707 hête si ez niemer getân .
0,7708 si müese gewalt unde vorhte hân .
0,7709 sus gewan si vorhte von der drô .
0,7710 “nû tuot dâr mit” sprach si dô .
0,7711 “weder minnere noch mêr .
0,7712 niuwan daz iu rehte stê .
0,7713 ich wile unde muoz si wern .
0,7714 sît ir sîn niht wellt entbern .
0,7715 ich teile ir liute unde lant .
0,7716 des sît ir bürge unde pfant .”
0,7717 dô sprach der küninc “daz sî getân .”
0,7718 wande ez an in was verlân .

0,7719 sô wart ez wole verendet .
 0,7720 verbürget unde verpfendet .
 0,7721 daz si ire teil ze rehte entvie .
 0,7722 der küninc sprach . dô daz ergie .
 0,7723 “neve Gâwein nû entwâfene dich .
 0,7724 sô entwâfenet ouch hêrr Iwein sich .
 0,7725 wande iu ist beiden ruowe nôt .”
 0,7726 dô tâten si daz er gebôt .
 0,7727 nû was der lewe ûz komen .
 0,7728 als ir êr habet vernomen .
 0,7729 dâ er in geslozzen wart .
 0,7730 unde jagete ûf sînes hêrren vart .
 0,7731 dô si in zuo in sâhen .
 0,7732 dort über velt gâhen .
 0,7735 dô vlôch man unde wîp .
 0,7736 durch behalten den lîp .
 0,7737 unz daz der hêrr Iwein sprach .
 0,7738 “er ne tuot iu dechein ungemach .
 0,7739 er ist mîn vriunt unde suochet mich .”
 0,7740 dô verstuonten si allrêreste sich .
 0,7741 daz ez der degen mære .
 0,7742 mit dem lewen wære .
 0,7743 von dem si wunder hôrten sagen .
 0,7744 unde der den risen hête erslagen .
 0,7745 “geselle” sprach hêrr Gâwein dô .
 0,7746 ich mac wole iemer sîn unvrô .
 0,7747 daz ich iu sus gedanket hân .
 0,7748 des ir mir liebes habet getân .
 0,7749 den risen sluoget ir durch mich .
 0,7750 des ruomte mîn niftel sich .
 0,7751 wande ir entbutet mir ez bî ir .
 0,7752 “ez hête durch mich” seite si mir .
 0,7753 “der rîtær mit dem lewen getân .”
 0,7754 ir ne woltet si niht wizzen lân .
 0,7755 wie ir wæret genant .
 0,7756 dô neic ich umbe in alliu lant
 0,7757 ich ne weste war ode wem .
 0,7758 wande ich meinte ez hin ze dem .
 0,7759 der durch mich bestuont die nôt .
 0,7760 unde es ne letze mich der tôt .
 0,7761 ich gediene ez iemer als ich sol .
 0,7762 ich erkenne iuch bî dem lewen wole .
 0,7763 sus lief der lewe zuo im her .
 0,7764 sînem hêrren erzeigete er .
 0,7765 vröuwede unde vriuntschaft .
 0,7766 mit aller der kraft .
 0,7767 als ein stummez tier dem manne .
 0,7768 vriuntschaft erzeigen kan .

0,7769 zehant wart in beiden .
0,7770 ein ruowe bescheiden .
0,7771 dâ in genâde unde gemach .
0,7772 zuo ire wunden geschach .
0,7773 arzât gewan hêrr Gâwein .
0,7774 im selbem unde in zwein .
0,7775 ze heilenne ire wunden .
0,7776 ouch pflac ir ze allen stunten .
0,7777 diu kûningîn unde Artûs .
0,7778 des bûweten si daz siechhûs .
0,7779 vile unlange stunt .
0,7780 unz daz si wâren wole gesunt .
0,7781 dô dem hêrrn Iwein wart gegeben .
0,7782 kraft unde gesunt leben .
0,7783 noch wâren im die sinne .
0,7784 von sîner vrouwen minne .
0,7785 sô manigen wîs ze verhe wunt .
0,7786 in dûhte ob in ze kurzer stunt .
0,7787 sîn vrouwe niht en lôste .
0,7788 mit ir selber trôste .
0,7789 sô müese ez schiere sîn sîn tôt .
0,7790 in twanc diu minnente nôt .
0,7791 ûf disen gæhen gedanc .
0,7792 “ich trîbe ez kurz ode lanc .
0,7793 sô ne weiz ich wie ire minne .
0,7794 iemer gewinne .
0,7795 wan daz ich zuo dem brunnen var .
0,7796 unde gieze dar unde aber dar .
0,7797 gewinne ich kumber dâ von .
0,7798 sô bin ich kumbers wole gewon .
0,7799 unde lîde in gerner kurze tage .
0,7800 danne daz ich iemer kumber trage .
0,7801 ouch lîde ich kumber iemer mêr .
0,7802 ir ne getuo der kumber ouch sô wê .
0,7803 daz ich noch ire minne .
0,7804 mit gewalt gewinne .”
0,7805 mit sînem lewen stal er sich dar .
0,7806 daz sîn nieman wart gewar .
0,7807 dâ ze hove noch anderswâ .
0,7808 unde machete kumbers weter dâ .
0,7809 daz wart als ungehiure .
0,7810 daz in dem gemiure .
0,7811 nieman trûwete genesen .
0,7812 “vervluochet müeze er iemer wesen .”
0,7813 sprach dâ wîp unde man .
0,7814 der ie von êrste began .
0,7815 bûwen hier ze lande .
0,7816 diz leit unde dise schande .

0,7817 tuot uns ein man swenne er wile .
 0,7818 boeser stete der ist vile .
 0,7819 iedoch ist diz diu boeseste stat .
 0,7820 dâr ûf ie hûs wart gesazt .
 0,7821 daz waltgevelle wart sô grôz .
 0,7822 unde der sûs unde der dôz .
 0,7823 werte mit dem schalle .
 0,7824 daz er die liute alle .
 0,7825 gar verzwîveln tet .
 0,7826 dô sprach ire juncvrouwe Lûnete .
 0,7827 “vrouwe kumet vile drâte .
 0,7828 der dinge ze râte .
 0,7829 wâ ir den man vindet .
 0,7830 mit dem ir überwindet .
 0,7831 disen schaden unde diz leit .
 0,7832 der ist iu weiz got ungereit .
 0,7833 man en suoche in danne verre .
 0,7834 ir ne mohtet schande mêrre .
 0,7835 niemer gewinnen .
 0,7836 swenne er nû scheidet hinnen .
 0,7837 alles strîtes erlân .
 0,7838 der iu diz laster hât getân .
 0,7839 diz geschihet iu aber morgen .
 0,7840 ir ne wellt baz besorgen .
 0,7841 die selben sache .
 0,7842 man lâit iuch mit gemache .
 0,7843 niemer mêre geleben .”
 0,7844 “maht dû mir danne rât geben .”
 0,7845 sprach diu vrouwe zuo ire maget .
 0,7846 “nû sî dir mîn nôt geklaget .
 0,7847 wan dû mînes dinges weist .
 0,7848 alsô vile sô ieman meist .”
 0,7849 si sprach “vrouwe ir habet den rât .
 0,7850 der wole baz ze staten stât .
 0,7851 ich bin ein wîp næme ich mich an .
 0,7852 ze râtenne als ein wîse man .
 0,7853 sô wære ich tumber danne ein kint .
 0,7854 ich lîde mit den andern die hier sint .
 0,7855 daz mir ze lîdenne geschihet .
 0,7856 unz man noch dirre tage gesihet .
 0,7857 wen iuwer rât vinde .
 0,7858 von iuwer geminde .
 0,7859 der dise bürde an sich neme .
 0,7860 unde daz er uns ze hêren zeme .
 0,7861 ez mac wole sîn daz ez geschihet .
 0,7862 iedoch verwæne ich mich sîn niht .”
 0,7863 si sprach “dû solt die rede lân .
 0,7864 ich ne hân gedingen noch wân .

0,7865 daz ich in iemer vinde .
0,7866 in mînem gesinde .
0,7867 nû rât dâr nâch daz bezziste .”
0,7868 si sprach “der danne weste .
0,7869 den rîtær der den risen sluoc .
0,7870 unde der mich lasters übertruoc .
0,7871 daz er mich von dem rôste .
0,7872 hier vore iu erlôste .
0,7873 der iu den selben suochte .
0,7874 ob er komen geruochte .
0,7875 sô ne wær ez niender baz bewant .
0,7876 doch ist mir ein dinc wole erkant .
0,7877 ez ne hülfe niemannes list .
0,7878 unz im sîn vrouwe ungenædic ist .
0,7879 daz er vüere durch in .
0,7880 weder her ode hin .
0,7881 er ne tæte im danne sicherheit .
0,7882 daz er nâch rehter arbeit .
0,7883 mit allen sînen dingen .
0,7884 dâ nâch hülfe ringen .
0,7885 ob er durch in iht tæte .
0,7886 daz er wider hæte .
0,7887 sîner vrouwen minne .”
0,7888 diu vrouwe sprach “die sinne .
0,7889 der mir unser hêrre gan .
0,7890 die kêre ich alle dâr an .
0,7891 beide lîp unde guot .
0,7892 daz ich im ire zornmuot .
0,7893 vertrîbe ob ich iemer mac .
0,7894 des entvâch mînen hantslac .”
0,7895 dô sprach aber vrouwe Lûnete .
0,7896 “ir sît süeze unde iuwer bete .
0,7897 welich guot wîp wære von den siten .
0,7898 die ir ze vlîze woltet biten .
0,7899 diu iht versagen kunde .
0,7900 einem alsô süezen munde .
0,7901 ob es iu âne valschen list .
0,7902 ernest wirdet ode ernest ist .
0,7903 sô muoz er wole ire hulde hân .
0,7904 ich ne mac iuch des niht erlân .
0,7905 ir ne geheizet im ez mit eide .
0,7906 ê daz ich von iu scheide .”
0,7907 des eides was si gereit .
0,7908 vrouwe Lûnete gap ir den eit .
0,7909 unde wart vile gar ûz genomen .
0,7910 daz im ze staten mohte komen .
0,7911 nâch dem si dâ solte varn .
0,7912 si sprach “vrouwe ich muoz bewarn .

0,7913 mit solichen witzen den eit .
0,7914 daz mich decheiner valscheit .
0,7915 ieman zîhe dâr an .
0,7916 er ist ein vile stæte man .
0,7917 nâch dem ich dâ rîten sol .
0,7918 unde bedarf dâ stæter rede wole .
0,7919 wellt ir nâch im senden .
0,7920 diu wort mit werken enden .
0,7921 der ich ze dem eide niht entbire .
0,7922 sô sprechet vrouwe nâch mir .”
0,7923 die vinger wurden ûf geleit .
0,7924 alsus gap si den eit .
0,7925 “ob der rîtær her kumet .
0,7926 unde mir ze mîner noete vrumet .
0,7927 mit dem der lewe varnte ist .
0,7928 daz ich âne allen argen list .
0,7929 mîne maht unde mînen sin .
0,7930 dâr an kêrente bin .
0,7931 daz ich im wider gewinne .
0,7932 sîner vrouwen minne .
0,7933 ich bite mir got helfen sô .
0,7934 daz ich iemer werde vrô .
0,7935 unde dise guoten heiligen .”
0,7936 dô ne was dâ niht verswigen .
0,7937 des er bedurfen solte .
0,7938 den si bringen wolte .
0,7939 sich underwant vrouwe Lûnete .
0,7940 der reise die si gerne tet .
0,7941 hin reit diu guote .
0,7942 mit vroelîchem muote .
0,7943 unde was ir doch ze der stunt .
0,7944 lützel dâr umbe kunt .
0,7945 dô si der verte begunde .
0,7946 wâ si in vûnte .
0,7947 unde wart ir kurzlîche kunt .
0,7948 ire vile sæliger vunt .
0,7949 wan si in bî dem brunnen vant .
0,7950 er was ir bî dem lewen erkant .
0,7951 ouch erkante si ire hêrre .
0,7952 dô er si sach von verre .
0,7953 mit guotem willen gruozte er si .
0,7954 “daz ich iuch sô nâhen bî .
0,7955 vunden hân des lobe ich got .
0,7956 vrouwe Lûnete ist diz iuwer spot .
0,7957 ode habet ir mich gesuochet .”
0,7958 “jâ hêrre ob ir es geruochet .”
0,7959 “waz ist daz ir gebiette .”
0,7960 “dâ habet ir iuch geniet .

0,7961 ein teil von iuwarn schulden .
 0,7962 unde von ire unhulden .
 0,7963 von der iu diente diz lant .
 0,7964 unde diu mich ûz hât gesant .
 0,7965 einer langen arbeit .
 0,7966 si ne welle brechen danne ire eit .
 0,7967 diu mich dâ ûz sendet .
 0,7968 sô hân ich iu verendet .
 0,7969 die rede alsô verre .
 0,7970 daz ir aber mîn hêrre .
 0,7971 werden sulet in kurzer vrist .
 0,7972 als si mîn vrouwe ist .”
 0,7973 hier was grôz vröuwede von in zwein .
 0,7974 doch ne wart mîn hêrr Iwein .
 0,7975 vore des nie als vrô .
 0,7976 von grôzen vröuweden kuste er dô .
 0,7977 sîner juncvrouwen munt .
 0,7978 wange unde ougen tûsent stunte .
 0,7979 er sprach “ir habet bescheinet .
 0,7980 vile wole wie ir mich meinete .
 0,7981 ich vürhte sêre unde ist mîn klage .
 0,7982 daz mir des guotes unde der tage .
 0,7983 ode beider zerrinne .
 0,7984 êr ich die grôzen minne .
 0,7985 ze rehte umbe iuch verschulden müge .
 0,7986 als ez dem dieneste tüge .
 0,7987 den ir mir . habet getân .”
 0,7988 si sprach “die rede sulet ir lân .
 0,7989 ir gewinnet tage unde daz guot .
 0,7990 hête ich gedienet den muot .
 0,7991 daz mir genâde würde schîn .
 0,7992 unde swem ir genædic woltet sîn .
 0,7993 ich ne hân niht baz wider iuch getân .
 0,7994 ir ne wellt ez danne baz entwâhen .
 0,7995 danne der des andern guot entnimet .
 0,7996 unde swenne in geldes gezimet .
 0,7997 daz er im geldes ist bereit .
 0,7998 ir entlihet mir michel arbeit .
 0,7999 dô ich wære verbrant .
 0,8000 ob ir ez niht hêtet erwant .
 0,8001 vüre mînen lîp was iuwer leben .
 0,8002 ûf die wâge gegeben .
 0,8003 dô gâbet ir mir disen lîp .
 0,8004 ez verdienten niemer tûsent wîp .
 0,8005 die genâde die ir mir habet getân .”
 0,8006 er sprach “die rede sulet ir lân .
 0,8007 ir habet vaste überzalt .
 0,8008 mir ist vergolten tûsentvalt .

0,8009 swaz ich ie durch iuch getet .
0,8010 nû saget mir vrouwe Lûnete .
0,8011 weiz si doch daz ich ez bin .”
0,8012 si sprach “daz wære der ungewin .
0,8013 si ne weiz von iu geloubet mir ez .
0,8014 ze der werlte mêre wan daz ir ez .
0,8015 der rîtær mit dem lewen sît .
0,8016 si bevindet ez noch ze guoter zît .”
0,8017 dô riten si ze hûse dannen .
0,8018 unde in bekom dâ wîp noch man .
0,8019 daz ne vuogte ouch anders niht .
0,8020 niuwan ein wunderlich geschiht .
0,8021 daz si dâ nieman rîten sach .
0,8022 unz si ergriffen ire gemach .
0,8023 dô gienc vrouwe Lûnete .
0,8024 dâ si an ire gebete .
0,8025 ire vrouwen alterseine vant .
0,8026 unde sagete ir zehant .
0,8027 daz er komen wære .
0,8028 dô ne hête si dechein mære .
0,8029 alsô gerne vernomen .
0,8030 si sprach “nû sî er willekomen .
0,8031 ich wile in harte gerne sehen .
0,8032 swie daz mit vuoge mac geschehen .
0,8033 genc hin zuo im unde ervar .
0,8034 wile er her ode sol ich dar .
0,8035 daz sî wan ich bedarf sîn .
0,8036 er gienge nâch mir bedorfte er mîn .”
0,8037 vile schiere brâhte in vrouwe Lûnete .
0,8038 er vuor swie in diu varn tet .
0,8039 gewâfenet daz im nihtes gebrast .
0,8040 sî entvie den wirt vûre einen gast .
0,8041 unde bî dem êrsten gruoze .
0,8042 viel er ir ze vuoze .
0,8043 unde hête doch decheine bete .
0,8044 dô sprach vrouwe Lûnete .
0,8045 “vrouwe heizet in ûf stân .
0,8046 unde als ich im geheizen hân .
0,8047 sô sulet ir loesen den eit .
0,8048 ich sage iu mit der wârheit .
0,8049 daz diu helfe unde der rât .
0,8050 niuwan an iu einer stât .”
0,8051 si sprach “nû bewîse mich .
0,8052 durch sînen willen tuon ich .
0,8053 swaz ich mac unde sol .”
0,8054 si sprach “vrouwe ir redet wole .
0,8055 nû ne hülfe im nieman baz .
0,8056 sîn vrouwe diu im ist gehaz .

0,8057 gebietet ir diu lâ ir zorn .
0,8058 gebietet ir er ist verloren .
0,8059 unde mohte iu daz wole wesen leit .
0,8060 ir ne habet mit der wârheit .
0,8061 decheinen bezzern vriunt danne er ist .
0,8062 ez wolte unser hêrre Krist .
0,8063 unde wiste mich ûf die vart .
0,8064 daz er sô gâhes vunden wart .
0,8065 daz diu vremede von iu zwein .
0,8066 würde gesamenet in ein .
0,8067 sô ne sol iuch danne dechein ander nô .
0,8068 gescheiden niemer âne den tô .
0,8069 nû behaltet iuwer wârheit .
0,8070 unde loeset den eit .
0,8071 vergebet im sîne missetât .
0,8072 wande er dechein ander vrouwen hât .
0,8073 noch gewinnet noch nie gewan .
0,8074 diz ist hêrre Iwein iuwer man .”
0,8075 diu rede dûhte si wunderlich .
0,8076 unde trat vile gâhes hinder sich .
0,8077 si sprach “hâs dû mir wâr geseit .
0,8078 sô hât mich dîn karcheit .
0,8079 wunderliche hin gegeben .
0,8080 sol ich dem hinne vürder leben .
0,8081 der ûf mich dechein ahte hât .
0,8082 daz ist wâr des hête ich gerne rât .
0,8083 mir ne getet daz weter nie sô wê .
0,8084 daz ne wolte ich iemer liden êr .
0,8085 danne ich ze langer stunte .
0,8086 mînes lîbes gunde .
0,8087 decheinen sô gemuoten man .
0,8088 der nie dechein ahte ûf mich gewan .
0,8089 unde sage dir mit der wârheit .
0,8090 twünge mich es niht der eit .
0,8091 sô wær ez unergangen .
0,8092 der eit hât mich gevangen .
0,8093 der zorn ist mînhalp dâ hin .
0,8094 gedienen müeze ich noch umbe in .
0,8095 daz er mich lieber welle hân .
0,8096 danne er noch habe getân .”
0,8097 der hêrre Iwein vroelichen sprach .
0,8098 dô er gehôrte unde sach .
0,8099 daz im sîn rede ze heile sluoc .
0,8100 unde der kumber den er truoc .
0,8101 daz der ein ende solte hân .
0,8102 “vrouwe ich hân missetân .
0,8103 ze wære daz riuwet mich .
0,8104 ouch ist daz gewonlich .

0,8105 daz man dem schuldigen manne .
0,8106 swie swære schulde er ie gewan .
0,8107 nâch riuwe schulde vergebe .
0,8108 unde daz er in der buoze lebe .
0,8109 daz er ez niemer mêr getuo .
0,8110 nû ne hoeret anders niht dâ zuo .
0,8111 wan kume ich nû ze hulden .
0,8112 si ne wirdet von mînen schulden .
0,8113 niemer mêre verloren .”
0,8114 si sprach “ich hân es gesworen .
0,8115 ez wære mir liep ode leit .
0,8116 daz ich es mit gewarheit .
0,8117 iht wider komen kunde .”
0,8118 er sprach “diz ist diu stunte .
0,8119 die ich wole iemer heizen mac .
0,8120 mîner vröuweden ôstertac .”
0,8121 dô sprach diu künigîn .
0,8122 “hêrr Iwein lieber hêrre mîn .
0,8123 tuot genædicliche an mir .
0,8124 grôzen kumber habet ir .
0,8125 von mînen schulden erliten .
0,8126 des wile ich iuch durch got biten .
0,8127 daz ir ruochet mir vergeben .
0,8128 wande er mich unz ich hân daz leben .
0,8129 von herzen iemer riuwen muoz .”
0,8130 dâ mit viel si an sînen vuoze .
0,8131 unde bat in harte verre .
0,8132 “stêt ûf” sprach der hêrre .
0,8133 “ir ne habet decheine schulde .
0,8134 wan ich hête iuwer hulde .
0,8135 niuwan durch mînen muot verloren .”
0,8136 sus wart versüenet der zorn .
0,8137 hier sach diu vrouwe Lûnete .
0,8138 die suone diu ir sanfte tet .
0,8139 swâ man unde wîp .
0,8140 habent guot unde lîp .
0,8141 schoene sinne unde jugent .
0,8142 âne ander untugent .
0,8143 werdent diu gesellen .
0,8144 diu kunnen unde wellen .
0,8145 einander behalten .
0,8146 lât diu got alten .
0,8147 diu gewinnent manige sîeze zît .
0,8148 daz was hier allez wænlich sît .
0,8149 hier was vrouwe Lûnete mite .
0,8150 nâch ire dienesthaftem site .
0,8151 diu hête mit ire sinne .
0,8152 ir beider unminne .

0,8153 brâht ze allem guote .
 0,8154 als si in ire muote .
 0,8155 lange hête gegert .
 0,8156 ire dienest was wole lônnes wert .
 0,8157 ouch wæne si es alsô genôz .
 0,8158aa daz si des kumbers niht verdrôz .
 0,8158ab er lônete ir nâch vrouwen sælden bete .
 0,8158ac bürge lant rîche stete .
 0,8158ad machete er ir undertân .
 0,8158ae unde als ich vernomen hân .
 0,8158af si ne wart mit hîrâte niht betrogen .
 0,8158ag einem rîchen herzogen .
 0,8158ah schoenem jungen manhaft .
 0,8158ai volkomen gar an ritterschaft .
 0,8158aj wîse unde gewære .
 0,8158ak milte unde êrbære .
 0,8158al dem gap er si ze wîbe .
 0,8158am von geburt unde an lîbe .
 0,8158an was si wole in der ahte .
 0,8158ao daz si mit êren mahte .
 0,8158ap rîches landes vrouwe sîn .
 0,8158aq der küninc unde diu künigîn .
 0,8158ar hêten überwunden .
 0,8158as an den selben stunten .
 0,8158at mit vröuweden alle ire swære tage .
 0,8158au des ich gote noch genâde sage .
 0,8158av wan swaz er kumbers erleit .
 0,8158aw die wîle er sîne vrouwen meit .
 0,8158ax dâ mit was ir niht ze wole .
 0,8158ay ire lîp was herzeriuwe vol .
 0,8158az si truoc der sorgen überlast .
 0,8158ba sô daz ir leides nie gebrast .
 0,8158bb unz ûf die sæligen zît .
 0,8158bc daz guot gemüete den strît .
 0,8158bd behabete an swærem muote .
 0,8158be si hêten nû mit guote .
 0,8158bf ire leides vergezzen .
 0,8158bg unde vröuwede besezzen .
 0,8159 ez was guot leben wænlich hier .
 0,8160 ich ne weiz aber waz ode wie .
 0,8161 in sît geschæhe beiden .
 0,8162 ez ne wart mir niht bescheiden .
 0,8163 von dem ich die rede habe .
 0,8164 durch daz en kan ouch ich dâr abe .
 0,8165 iu niht gesagen mêre .
 0,8166 wan got gebe uns sælde unde êre .